



安徽通志

ル 5
1575
3



1875
3

重修安徽通志卷五

皇言紀

世宗憲皇帝詔諭

雍正八年

上諭浙江蘇松湖廣江西安徽等處

恭紀食貨志漕運

上諭今年直隸山東江南有被水之州縣聞本地乏食窮民有餬口散往鄰封者若該地方官員視為他處之人不肯加意賑恤必致流離失所且三春耕種之時若不旋歸本土又必致荒棄本業朕心甚為軫念爾等可作字寄與各省督撫令其轉飭有司凡遇今年外來被災就食之窮民即動支常平倉穀大口日給一升小口五合核實賑恤再動用存公銀兩賞為路費咨送回籍並行文知會原籍地方官收留照管總在該督撫督率屬員善於料理以副朕心其所用銀兩



重刊文錄通志卷五
著該督撫查核報銷嗣後以此爲例謹增

上諭朕訪聞得有數省督撫司道不能約束書吏者其胥役人等狐假虎威無惡不作而督撫衙門爲尤甚其名有內外班之分內班經管案件外班傳遞信息朋比作奸種種嚇詐飽其貪壑則改重爲輕拂其所欲則批駁不已卽如廣東各案盜犯未獲無論年月遠近不拘盜犯多寡總督書辦槩於冬季寫票差提承緝之吏目典史巡檢齊至肇慶示期比責其陋規則有院房年節禮每員到彼各送書辦銀三四十兩遂准回任若微員無力餽送則差押不放甚至稟請杖責此粵省之弊端也至於各省督撫書役則有承舍旗牌等名皆自號爲差官該督撫給票差遣亦用差官字樣而通省士民遂莫不以差官目之平日踞坐差房包攬詞狀每於府州縣官謁見督撫之便私行囑託濫准枉斷及差往他處則肩輿逾分馬挂胸纓儼然官長沿

途拜會有司需索夫馬餽送此輩狡狴性成或以小忠小信趨奉本官得其歡心間或委其訪察屬員事跡則假公濟私作威作福其害更不可言矣從來胥役之爲患有關吏治在精明廉察之督撫自能覺照而防範之而庸懦之督撫爲所欺而不知受其累而不悟者正不少也又如藩司掌通省之錢糧臬司掌通省之刑名案牘如山不得不少不仗熟練之書役爲之辦理而其中百弊叢生舞文弄法之處不可悉數朕素知此輩之情狀已經定例嚴申禁約今再行訓飭是在督撫藩臬等約束於平時訪查於臨事不因熟悉條例而輕聽其言不因善承使令而誤墮其術秉公駕馭用意防閑一有見聞卽加懲治不存姑息之見不畱回護之心如此則若輩雖欲舞弊而不能雖欲玩法而不敢矣儻任封疆岳牧之寄於一二管轄之書吏不能使之安分守法格其非心又安能察吏安民詰奸禁暴成移風易俗之

治乎朕深爲庸懦之督撫藩臬恥之特諭

謹增

上諭尙書舜典云欽哉欽哉惟刑之恤哉朱子曰所謂欽恤者欲其詳審曲直令有罪者不得免而無罪者不濫刑也吾弟怡賢親王常奏朕云今法司衙門凡有審問事件並不究其情之虛實動以夾訊夫聽斷之下求之於辭氣耳目以察其情設誠以待之據理以鞫之未有不其實者何庸夾訊儻有證佐確據情罪顯著而本犯猶狡獪不以實供則不得已而用刑若並不詳鞫其情而概用重刑嚴訊三木之下何求不得此重案之未免有冤抑牽累也吾弟之言如此是以八年來凡朕交王承審數十件繁難大案皆以誠敬用心以情理感格愚頑簡孚閱實俾各自將罪犯委曲招吐從未會夾訊榜楚一人而諸案情罪無不允當吾弟之存心忠厚如此凡爲法司者皆當奉以爲法也今外省有司既不能聽辨五詞無明決折獄之才每遇

重大案件至期限將滿之時慮及處分則連用重刑該犯欲緩須與之命凡官吏訊問之語靡不承認遂據其供招鍛鍊成獄且凡遇命盜案件其中牽連之人有司亦明知其無辜而欲爲開釋恐致上司之翻駁遂有非夾訊不能歸結之論夫欲保全一己之功名彌縫上司之查駁無論情之虛實罪之輕重輒用三木以訊每致案未結而有刑斃之人此其居心尙可問乎從前阿爾松阿爲刑部時不能剖斷曲直乃各將原被告之一足其一三木此天良喪盡之人視夾訊爲兒戲其心之殘忍慘毒甚矣未幾而身爲叛逆不能保其首領善惡之報豈有爽乎吾弟怡賢親王存心仁恕固不待言而其本懷總不欲使天下有一冤抑人俾國家受濫刑之議此其忠君愛國之心出於誠懇篤摯是以凡有聽斷歸乎至當能使羣議帖服刑章式敘也今吾弟仙逝之後凡啟靈大祀之日

上天必賜以清和景象而羣工黎庶各致其哀慕深情成一千古以來未有之賢王此

天之報吾弟亦云厚矣吾弟嘉謨入告之事不可勝數偶因戒飭問官輕用三木一節將吾弟數奏之言宣示於眾且布告各省有司合咸以吾弟怡賢親王之聽訟居心奉爲案鞫之規範則明慎用刑庶幾咸中有慶矣著凡掌刑名衙門將此諭刊榜永示於堂署特諭

上諭收令爲親民之官一人賢否關係萬姓之休戚故自古以來慎重其選而朕之廣覽旁求訓勉告誡冀其奏循良之績以惠我蒸黎者亦備極苦心矣惟是地方事務皆發端於州縣頭緒紛繁情偽百出而膺斯任者類皆初登仕籍之人未練習於平時而欲措施於一旦無怪乎徬徨瞻顧心志茫然卽采訪咨詢而告之者未必其盡言無隱此古人所以有學製美錦之歎也向以大學士朱軾左都御史沈

近思外任多年周知地方利弊雍正二年曾令二臣商著規則以爲州縣之南車乃書未就緒而沈近思物故邇年以來朱軾復時多病此事遂至遲延去年始降旨委諸總督田文鏡李衛今二臣各抒所見繕錄諸條以進朕親加披覽見其條理詳明言詞剴切民情吏習罔不兼該大綱細目莫不備舉誠新進之津梁庶官之規範也在二臣各就其所閱歷者而言繁簡同異之間不必一致而慎守官方勤恤民隱興利除害易俗移風其大指則一而已矣爰就本文付之剞劂頒賜州縣官各一帙俾置之几案間朝夕觀覽省察提撕治效未臻必思所以勉之弊端未革必思所以去之本之以實心行之以實力毋始勤而終怠毋靜言而庸違如此則不但國家得司牧之賢草野有父母之頌而爾等身膺顯擢叨被榮光福貽子孫名標史冊豈不美歟特諭

上諭上江宣涇等十七州縣著動支帑銀賑濟

恭紀食貨志蠲賑

上諭向來蠲免錢糧額徵漕米不在所蠲之內朕思京通各倉米粟年來悉心經理已有餘積又有直隸營田所產稻米可以採買貯倉是京通倉儲有日增之勢今年山東地方被水稍重而直隸江南河南三省亦間有被水之州縣夫地方既已歉收則漕粟輸將未免竭蹶著將山東被水之州縣漕糧全行蠲免直隸江南河南被水州縣之漕糧按成災之分數蠲免其山東未被水州縣應完之漕糧不必運送京師即留於東省以充兵餉如此則各該地方皆有多餘之米糧於民生大有裨益著直隸河南山東江南督撫遵照諭旨分別速行辦理務令妥協俾閭閻均霑實惠以副朕格外加恩之至意

旨直隸江南等省督撫

恭紀食貨志蠲賑

上諭從前朕以武弁一年所領俸薪不敷所用

恭紀武備志

雍正十年

旨錢糧分年帶徵

恭紀食貨志蠲賑

雍正十一年

上諭各省學校之外地方大吏每有設立書院聚集生徒講文肄業者朕臨御以來時時以教育人材為念但稔聞書院之設實有裨益者少而浮慕虛名者多是以未曾敕令各省通行蓋欲徐徐有待而後頒降諭旨也近見各省大吏漸知崇尚實政不事沽名邀譽之為而讀書應舉之人亦頗能屏去浮囂奔競之習則建立書院擇一省文行兼優之士讀書其中使之朝夕講誦整躬厲行有所成就俾遠近士子觀感奮發亦興賢育才之一道也督撫駐劄之所為省會之地著該督撫商酌舉行各賜帑金一千兩將來士子羣聚讀書須預為籌畫資其膏火以垂永久其不足者在於存公銀內支用封疆大臣

等兼有化導士子之職各宜殫心奉行黜浮崇實以儲國家菁莪
樸之選如此則書院之設有裨益於士習文風而無流弊乃朕之所
厚望也特諭

上諭博學宏詞之科恭紀選舉志

旨各省保送優生恭紀選舉志

上諭本年江南應徵漕米朕已降旨密飭該督撫等以半本半折徵收
為接濟民食之用惟是漕糧既一半改折則漕船亦應一半停運定
例漕船減歇之年該運丁給與一半月糧以為養贍今於上年業已
緩截本年又復減歇其行裝等項俱經預備於將次出運之時旋復
停運則所領一半月糧或不敷用未免艱苦著將本年應支月糧等
項悉行賞給此賞給銀米乃朕格外特恩嗣後不以為例

雍正十三年

上諭父母之恩昊天罔極而喪禮以三年為斷者所以節仁人孝子之
哀而使有所極也三年之喪猶不能終則百行皆無其本矣魯公禽
父衰經而即戎孔子以為有為為之也古者諸侯之大夫士雖有既
葬而服國事之禮然古之仕者不出其鄉殯斂皆親窆窆既營雖使
經而即事義尚可安也今之仕宦近者猶數百千里含斂不知宅兆
未卜而晏然於官所情能自己乎往者道府以上要缺閒有督撫保
題在任守制而

特旨從之者其後遂習為故常並及州縣微員其中有平日督撫所親
信而欲畱者有竟自願畱者有多方營求以得之者而不得者且用
為恥夫事親孝故忠可移於君使其人本仁孝而強奪其情則儼然
不能終日必至愴怳昏迷廢弛公事若以為安則忍戾貪冒之人也
國家安所用之而所治士民亦安能服其政教乎自後必其地其任

其事其時決不可少是人而無能相代者乃准保題以憑核奪餘俱停止永著為例謹增

上諭洪範庶徵凡雨暘之愆和關人事之得失所以著感應之理使修人事然水旱之災雖堯湯不能免惟有勤恤民隱竭力補救可以化災沴而成太和總在積至誠以昭假不可萌一念之欺罔也督撫身任封疆重寄奏報收成分數乃關係地方民命必確無欺罔始得議行蠲賑以甦民困朕平日畱心此事見各省陳報收成分數或有只據一方豐收數目為定雨水過多之處以高阜所收為準亢旱時有之年以低下所獲為準並不分析某處豐收某處歉穫其意祇圖粉飾以邀感召和氣之名而不知卽此一念欺罔已為獲罪於民獲罪於君而獲罪於

天矣夫至誠格

天乃聖人體信達順參贊化育之事爾等督撫卽使辦理妥協亦不過

仰承

皇考聖訓遵循罔越豈得因年歲之豐阜貪

天之功為己功乎若歲豐可引為己功則必歲歉懼為己罪捏報豐收

不恤民艱使飢凍流亡之慘不得上聞蠲免賑恤之恩不得下逮職

思其故誰為厲階清夜捫心何以自問且朕體

皇考敬

天勤民之意膺君國子民之任豈肯姑貸此等督撫以為民害耶嗣後

務各警醒所奏報各地方收穫分數不得絲毫假飾以干重戾謹增

上諭朕閱督撫參奏屬員及題請改教本章每有書生不能勝任及書

氣未除等語夫讀書所以致用凡修己治人之道事君居官之理備

載於書故傳說之告其君曰學于古訓乃有獲又曰念終始典于學

成王訓其臣曰學古入官議事以制政乃不迷又曰不學牆面莅事惟煩人不知書則偏頗以宅衷操切以處事生心害政有不可救藥者若州縣官果足以當書生二字則以易直子諒之心行寬和惠愛之政任一邑則一邑受其福蒞一郡則一郡蒙其休朕惟恐人不足當書生之稱而安得以書生相戒乎若以書生爲戒朕自幼讀書宮中講誦二十年未嘗少輟實一書生也王大臣爲朕所倚任朝夕左右者亦皆書生也若指屬員之迂謬疏庸者爲書生以相詬病則未知此正伊不知書所致而書豈任其咎哉至於書氣二字尤可寶貴果能讀書沈浸醞釀而有書氣更集義以充之便是浩然之氣人無書氣卽爲粗俗氣市井氣而不可列於士大夫之林矣是書氣正宜從容涵養以善培之安有勸之使除而反以未除爲病乎且朕聞外閒斥人之短每云伊欲做好人朱子云學者通病在思作貴人而不

思作好人人果欲做好人行好事則甚有益於民生有益於國事遺福無窮若以好人爲戒不幾相率而拂人之性乎凡此皆係識見粗鄙不知治體不明大義之言朕今姑發其蔽而教戒之當各翻然思悔特諭增

上諭朕聞利不十不變法害不十不易制蓋以政有恆則易守法數變則奸生而況州縣隸屬之有常文武職業之有定者乎往者直省一二州縣理宜改隸及員弁宜增設者

皇考會允督撫之請敕部議行而督撫中遂有借此以見其整飭地方畱心吏治而絕無關於利害之實者不知改隸一邑則獄訟錢穀緣絕簿書百弊叢生急難綜察增設一官則文移期會事緒益紛供給送迎閭閻滋擾且封域驟改奸宄或致潛藏官吏日增責任轉無專屬自後必州縣離府遼遠實宜改隸市鎮繁雜之地定須添官彈壓

重刊安海通志 卷五
者方准具題酌量其餘不許瀆奏至於守土之官必久於其職而後政教可行故周室邳隆居官者以爲姓氏兩漢之盛爲吏者得長子孫是以上下相親利病周知而民安其政教也近見道府州縣員缺督撫多題請更調有二三歲而更或一歲而更者如此則雖有循良不能從容展布民何由被其休澤諸督撫身爲大臣實心體國凡無關利害之事不宜陳奏況此類皆無利而有害者乎特論謹增

上諭四民之中惟農夫作苦自食其力最爲無愧筋力八材以利用非百工莫備士則學大人之學故祿其賢者能者至於商賈阜通貨賄亦未嘗無益於人而古昔聖王尙慮逐末者多令不得衣絲乘車推擇爲吏以重抑之今僧之中有號爲應付者各分房頭世守田宅飲酒食肉並無顧忌甚者且畜妻子道士之火居者亦然夫一夫不耕或受之飢一女不織或受之寒多一僧道則少一農民乃若輩不惟不耕而食且食必精良不惟不織而衣且衣必細美室廬器用玩好百物爭取華靡計上農夫三人肉袒深耕尙不足以給僧道一人不亦悖乎朕於二氏之學皆洞悉其源流今降此諭並非博不尙佛老之名也蓋見今之學佛人豈獨如佛祖者無有卽如近代高僧實能外形骸清淨超悟者亦稀今之道士豈獨如老莊者無有卽如前世山澤之癯實能凝神氣怡養壽命者亦稀苟能遵守戒律焚修於山林寂寞之區布衣粗食獨善其身猶於民無害也今則不事作業甘食美衣十百爲羣農工商賈終歲竭蹶以奉之而蕩檢踰閑於其師之說亦毫不能守是不獨在國家爲游民卽繩以佛老之教亦爲敗類而可聽其耗民財溷民俗乎著直省督撫飭各州縣按籍稽查除名山古剎收接十方叢林及雖在城市而願受度牒遵守戒律閉戶清修者不問外其餘房頭應付僧火居道士皆集眾面問還俗者

重刊後進通志卷五
聽之願守寺院者亦聽之但身領度牒不得擅受生徒所有貨產如何量給還俗及守寺院者爲衣食計其餘歸公畱爲地方養濟窮民之用并道士給度牒之法該部詳悉妥議具奏謹

上諭朕聞吉凶異道不得相干故娶在三年之外而聘在三年之內者春秋猶以爲非禮記稱大功之末可以冠子可以嫁子父小功之末可以娶婦已雖小功既卒哭可以冠子娶妻三年之喪創深痛鉅苟有人心者必宜於此焉變矣乃愚民不知禮教始於皐隸編氓之家有慮服喪後不得嫁娶乘父母疾篤及殯斂未終而成婚者其後商賈中家多有之士大夫亦閒爲之而八旗效之朕實憫焉自今伊始自齒朝廷之士下逮門內有生監者三年之喪非終喪不得嫁娶違者奪爵褫服其極貧皐隸編氓父母臥疾呻吟牀褥必賴子婦以躬薪水治饗者聽其迎娶監饋俟疾愈喪畢而後成婚古者禮不下

庶人其斯之謂與曾子問親迎女在途而婿之父母死女改服布深衣縞總以趨喪亦此義也其商賈中家不必以士大夫之禮繩之然人性皆善朕知其必有觀感興起而不忍自同於氓隸者矣謹

上諭朕聞之元后作民父母朕實代

天以子民督撫大臣又代朕以子民均有父母斯民之任者也爲治之道莫切於愛民其餘一切察吏理財明刑禁暴特教養中之餘事其本總歸於愛民而已天以愛民之職畀朕天下之民皆以朕爲必能愛民而民或失所民其何望朕以愛民之事分寄督撫大臣亦以督撫大臣爲必能愛民而民或失所朕更何望督撫大臣之不能體朕心以宣德意卽朕之不能答

天心以恤民依也爾督撫能知愛民之爲稱職始不負朕委任之心若錢糧不敢侵欺請託不敢假借弊竇不容毫髮羨餘不隱分釐此不

過一端一事之才能以矯飾外貌又安足以副封疆重寄哉夫朕一人之心思不能周知天下之利弊故有賴於督撫督撫一人之耳目不能徧悉地方之情形故有資於良有司是又在有司各愛其民而仍藉督撫之倡率鼓動之耳設督撫之於有司舉劾不當棄取失宜其害不在於有司仍在於百姓彼有司中之實心惠民不規小效所謂安靜之吏悃悃無華日計不足月計有餘者督撫將毋以為迂拙而罷之至於以苛為察以刻為明以輕為德以重為威此則拂人性逆人情者督撫將毋以為幹濟而舉之此則吾民失其所依怙朕何賴焉蓋治天下者在於治天下之人心必使民氣和暢民情豫順快然知有里井之可安恬然知有室家之可樂斯為無象之太平閭閻實被其澤此為直省中息事寧人安全休養之道在乎優游馴致而非可取必於旦夕間也朕每於諸王大臣及督撫大吏經理庶績必

寬之歲時無事乎督責之嚴程期之迫誠以欲速則不達久道乃化成也況郡縣長吏其才力遠不逮諸大臣欲以責效數月期年閒此中萬無速化之理亦惟有迎合意旨塗飾觀聽冀以博才能之名登報最之牘而民不堪命矣夫移風易俗者邗隆之上理也然必漸民以仁摩民以義使民日遷善而不自儻為督撫者一有移風易俗之見存之於心宣之於口朕知其人不但不能移易乎風俗而風俗且受其弊何者彼不知因民之道而日事驅民之術勢必更張成法煩擾地方為吾民之苦他若獻祥瑞報羨餘匿水旱奏開墾改土歸流更隸州縣所云揆之人事則悅耳論之陰陽則傷化其不以此也歟各省督撫大吏其尚自省其身其有不務實心實政而邀近功小利者必滌慮洗心董率屬僚與其天良以為民勸務底悖大成裕之

治特諭

謹

上諭朕御極恩詔內將出征兵丁所借銀兩俱已免其繳還恭紀武備志

御製

聖諭廣訓序

書曰每歲孟春遣人以木鐸徇於路記曰司徒修六禮以節民性明七教以興民德此皆以敦本崇實之道為牖民覺世之模法莫良焉意莫厚焉我

聖祖仁皇帝久道化成德洋恩普仁育萬物義正萬民六十年來宵衣旰食祇期薄海內外興仁講讓革薄從忠其成親遜之風永享昇平之治故

特頒上諭十六條曉諭八旗及直省兵民人等自綱常名教之際以至於耕桑作息之閒本末精麤公私鉅細凡民情之所習皆睿慮之所周視爾編氓誠為赤子

聖有謨訓明徵定保萬世守之莫能易也朕纘承大統臨御兆人以聖祖之心為心以

聖祖之政為政夙夜黽勉率由舊章惟恐小民遵信奉行久而或怠用申誥誡以示提撕謹將

上諭十六條尋繹其義推衍其文其得萬言名曰

聖諭廣訓旁徵遠引往復周詳意取顯明語多直樸無非奉

先志以啟後人使羣黎百姓家喻而戶曉也願爾兵民等仰體

聖祖正德厚生之至意勿視為條教號令之虛文其勉為謹身節用之

庶人盡除乎浮薄驕凌之陋習則風俗醇厚家室和平在朝廷德化

樂觀其成爾後嗣子孫並受其福積善之家必有餘慶其理豈或爽

哉

御製朋黨論

朕惟天尊地卑而君臣之分定為人臣者義當惟知有君惟知有君則其情固結不可解而能與君同好惡夫是之謂一德一心而上下交乃有心懷二三不能與君同好惡以至於上下之情睽而尊卑之分逆則皆朋黨之習為之害也夫人君之好惡惟求其至公而已矣凡用舍進退孰不以其為賢而進之以其為不賢而退之惟或恐其所見之未盡當也故虛其心以博稽眾論然必眾論盡歸於至正而人君從之方合於大公若朋黨之徒挾偏私以惑主聽而人君或誤用之則是以至公之心反成其為至私之事矣孟子論國君之進賢退不肖既合左右諸大夫國人之論而必加察焉以親見其賢否之實洪範稽疑以謀及乃心者求卿士庶民之從而皇極敷言必戒其好惡偏黨以歸於王道之蕩平正直若是乎人君之不自用而必欲盡化天下之偏私以成大同也人臣乃敢溺私心樹朋黨各徇其好

惡以為是非至使人君懲偏聽之生奸謂反不如獨見之公也朋黨之罪可勝誅乎我

聖祖仁皇帝御極六十年用人行政邁越千古帝王而大小臣僚未能盡矢公忠往往要朋結黨

聖祖戒飭再三未能盡改朕即位以來屢加申飭而此風尚在彼不顧好惡之公而徇其私暱牢不可破上用一人則相與議之曰是某所汲引者也於是乎遠之若浼曰吾避嫌也不附勢也爭懷妬心交騰謗口以媒孽之必欲去之而後快上去一人則相與議之曰是某所中傷者也親暱者為之惋惜疏遠者亦慰藉稱屈即素有嫌隙者至此反致其殷勤欲借以釋憾而修好求一人責其改過自新者無有也於是乎其人亦不復自知其過惡而愈以滋其怨上之心是朝廷之賞罰黜陟不足為重輕而轉以黨人之咨嗟歎息為榮以黨人之

指摘詆訾爲辱亂天下之公是公非作好惡以陰撓人主子奪之柄朋黨之爲害一至是哉且使人主之好惡而果有未公則何不面折廷爭而爲是陽奉陰違以遂其植黨營私之計也書曰子違汝弼汝無面從退有後言當時君臣告語望其匡弼而以面從後言爲戒夫是故一堂之上都俞吁咈用能賡歌拜颺以成太和之運朕無日不延見羣臣造膝陳詞何事不可盡達顧乃默無獻替而狡猾叵測蓄私見以肆爲後言事君之義當如是乎古純臣之事君也必期致吾君於堯舜而人君亦當以堯舜自待其身豈惟當以堯舜待其身亦當以皋夔稷契待其臣孟子曰責難於君謂之恭陳善閉邪謂之敬吾君不能謂之賊夫以吾君不能而謂之賊則爲君者以吾臣不能亦當謂之忍語云取法乎上僅得乎中苟不以唐虞君臣相期待而區區效法僅在漢唐以下是烏能廓然盡去其私心而悉合乎大公

至正之則哉宋歐陽修朋黨論創爲異說曰君子以同道爲朋夫罔上行私安得爲道修之所謂道亦小人之道耳自有此論而小人之爲朋者皆得假同道之名以濟其同利之實朕以爲君子無朋惟小人則有之且如修之論將使終其黨者則爲君子解散而不終於黨者反爲小人乎設修在今日而爲此論朕必飭之以正其惑大抵文人掉弄筆舌但求騁其才辯每至害理傷道而不恤惟六經語孟及宋五子傳注可奉爲典要論語謂君子不黨在易渙之六四曰渙其羣元吉朱子謂上承九五下無應與爲能散其朋黨之象大善而吉然則君子之必無朋黨而朋黨之必貴解散以求元吉聖人之垂訓亦旣明且切矣夫朋友亦五倫之一朋黨不可有而朋友之道不可無然惟草茅伏處之時恆資其講習以相欣助今旣登朝蒞官則君臣爲公議而朋友爲私情人臣當以公滅私豈得稍顧私情而違公

義且卽以君親之並重而出身事主則以其身致之於君而尙不能
爲父母有況朋友乎況可藉口於朋以怙其黨乎朕自四十五年來
一切情偽無不洞矚今臨御之後思移風易俗躋斯世於熙皞之盛
故兼聽並觀周諏博采以詳悉世務且熟察風俗之變易與否而無
知小人輒議朕爲煩苛瑣細有云人君不當親庶務者信若斯言則
皋陶之陳謨何以云一日二日萬幾孔子之贊舜何以云好問好察
此皆朋黨之錮習未去畏人君之英察而欲蒙蔽耳目以自便其好
惡之私焉耳朕在藩邸時坦易光明不樹私恩小惠與滿漢臣工素
無交與有欲往來門下者嚴加拒絕

聖祖見朕居心行事公正無私故令纘承大統今之好爲朋黨者不過
冀其攀援扶植緩急可恃而不知其無益也徒自逆天悖義以陷於
誅絕之罪亦甚可憫矣朕願滿漢文武大小諸臣合爲一心共竭忠
忱與君同其好惡之公恪遵大易論語之明訓而盡去其朋比黨援
之積習庶肅然有以凜尊卑之分歡然有以洽上下之情虞廷賡歌
颺拜明良喜起之休風豈不再見於今日哉

平定青海碑

我國家受

天眷命撫臨八極日月所照罔不臣順遐邇乂安兆人蒙福乃有羅卜
藏丹津者其先世固始汗自國初稽首歸命當時使臣建議畀以駐
牧之地其居襟番羌密近甘涼我

皇考聖祖仁皇帝睿慮深遠每廕於懷旣

親御六師平定朔漠威靈所加青海部落札什巴圖兒等震驚承命
聖祖仁皇帝因沛殊恩封爲親王兄弟八人咸賜爵祿羈縻包容示以
寬大而狼心梟性不可以德義化三十年來包藏異志朕紹登寶位

優之錫賚榮其封號尙冀革心輯寧部眾而羅卜藏丹津昏謬狂悖
同黨吹拉克諾木齊阿爾布坦溫布藏巴札布等實爲元惡謂國家
方弘浩蕩之恩不設嚴密之備誕敢首造逆謀迫脅番羌侵犯邊城
反狀彰露用不可釋於天誅遂命川陝總督太保公年羹堯爲撫遠
大將軍聲罪致討以雍正元年十月師始出塞自冬涉春屢破其眾
凡同叛之部落戈鋌所指應時摧敗招降數十萬眾又降其貝勒貝
子公台吉等二十餘人朕猶憫其蠢愚若悔禍思愆束手來歸尙可
全省而怙惡不悛負險抗違乃決翦滅之計以方略密付大將軍年
羹堯調度軍謀簡稽將士用四川提督岳鍾琪爲奮威將軍於仲春
初旬禡牙徂征分道深入搗其窟穴電掃風驅搜剔巖阻賊徒蒼黃
糜潰窮蹙失據羅卜藏丹津之母及逆謀渠魁悉就俘執擒獲賊眾
累萬牲畜軍械不可數計賊首逃遁我師踰險窮追獲其輜重人口

殆盡羅卜藏丹津孑身易服竄匿荒山殘喘待斃自二月八日至二
十有二日僅旬有五日軍士無久役之勞內地無轉輸之費克奏膚
功永清西徼三月之朔奏凱旋旅饒鼓喧轟士眾訢喜四月十有二
日以倡逆之吹拉克諾木齊等三人獻俘

廟

社受俘之日臣民稱慶伏念

聖祖仁皇帝威靈震於遐方福慶流於奕葉用克張皇六師殄滅狂賊
行開將士亦由感激

湛恩厚澤爲朕踊躍用命斯役也芟夷凶悖綏靖番羌俾燧燧永息中
外人民胥享安阜實成

先志以懋有不績廷臣上言稽古典禮出征而受成於學所以定兵謀
也獻馘而釋奠於學所以告凱捷也且刊諸珉石揭於太學用昭示

於無極遂爲之銘曰

天有雷霆聖作弧矢輔仁而行威遠寧邇維此青海種類實繁錫之茅土列在藩垣被我寵光位崇祿富負其阻遐禍心潛構恭維

聖祖慮遠智周睠念荒服綏撫懷柔朔野既清西陲攸震爵號渚加示之恩信如何凶狡造謀逆天鼓動昏愆寇侵於邊惟彼有罪自干天罰桓桓虎貔爰張九伐王師卽路冬雪初零日耀組練雷響鼙鉦蠢茲不順敢逆戎旅奮張螳臂以當齊斧止如山嶽疾如兩風我戰則克賊壘其空彼昏終迷曾不悔戾當翦而滅斯焉決計厲兵簡將往擣其巢踰歷嶽嶇坦若垆郊賊棄其家我縶而獲牛馬谷量器仗山積蹇免失窟何所遁逃枯魚遊釜假息煎熬師以順動神明所福旬日凱歸不疾而速殪彼逆謀懸首藁街獻俘成禮金鼓調諧西域所瞻此惟雄特天討既申羣酋惕息囊戈偃革告成辟雍聲教遐暨萬

國來同惟我

聖祖親平大漠魏功煥文邁桓軼勺流光悠久視此銘辭繼志述事念茲在茲

大清律集解序

周禮大小司寇之職以三典詰四方以五刑聽獄訟正歲帥其屬而觀刑象不用法者國有常刑月吉始和布刑於邦國都鄙乃懸刑象之法於象魏使萬民聚而觀之是知先王立法定制將以明示朝野俾官習之而能斷民知之而不犯所由息爭化而致於刑措也恭惟我

皇考聖祖仁皇帝大德如天以至仁涵育羣生法司上奏率多全宥停刑肆赦屢沛

恩綸

臨御六十一年厚澤周浹宇內而氣心知之倫熙然安處於仁壽之域朕守不基深懷繼述雍正元年八月乃命諸臣將律例館舊所纂修未畢者遴簡西曹殫心蒐輯彙本進呈朕以是書民命攸關一句一字必親加省覽每與諸臣辨論商推折中裁定或析異以歸同或刪繁而就約務期求造律之意輕重有權盡讞獄之情寬嚴得體三年八月編校告竣刊布內外永爲遵守易曰先王以明罰敕法漢鄭昌言律令一定愚民知所避奸吏無所施是書也豈惟百爾有位宜精思熟習悉其聰明以察大小之比凡士之注名吏部將膺民社之責者講明有素則臨民治事不假於幕客胥吏而判決有餘若自通都大邑至僻壤窮鄉所在州縣倣周禮布憲讀法之制時爲解說令父老子弟遞相告戒知畏法而重自愛如此則聽斷明於上牒訟息於下風俗可正禮讓可興於以體

皇考好生之德而追虞廷從欲之治不難矣朕實有厚望焉

大義覺迷錄序

自古帝王之有天下莫不由懷保萬民恩加四海膺

上天之眷命協億兆之歡心用能統一寰區垂庥奕世蓋生民之道惟有德者可爲天下君此天下一家萬物一體自古迄今萬世不易之常經非尋常之類聚羣分鄉曲疆域之私衷淺見所可妄爲同異者也書曰皇天無親惟德是輔蓋德足以一天下則天錫祐之以爲天下君未聞不以德爲感孚而第擇其爲何地之人而輔之之理又曰撫我則后虐我則仇此民心向背之至情未聞億兆之歸心有不論德而但擇地之理又曰順天者昌逆天者亡惟有德者乃能順天之所與又豈因何地之人而有所區別乎我國家肇基東土

列聖相承保乂萬邦

天心篤祐德教弘敷恩施遐暢登生民於衽席徧中外而尊親者百年於茲矣夫我朝既仰承

天命爲中外臣民之主則所以蒙撫綏愛育者何得以華夷而有殊視而中外臣民既共奉我朝以爲君則所以歸誠效順盡臣民之道者尤不得以華夷而有異心此揆之

天道驗之人理海隅日出之鄉普天率土之眾莫不知大一統之在我朝悉子悉臣罔敢越志者也乃逆賊呂留良凶頑悖惡好亂樂禍俶擾彝倫私爲著述妄謂德祐以後天地大變亙古未經於今復見而逆徒嚴鴻逵等轉相附和備極猖狂餘波及於曾靜幻怪相煽恣爲毀謗至謂八十餘年以來天昏地暗日月無光在逆賊等之意徒謂本朝以滿洲之君入爲中國之主妄生此疆彼界之私遂故爲訕謗詆譏之說耳不知本朝之爲滿洲猶中國之有籍貫舜爲東夷之人

文王爲西夷之人曾何損於聖德乎詩言戎狄是膺荆舒是懲者以其僭王猾夏不知君臣之大義故聲其罪而懲艾之非以其爲戎狄而外之也若以戎狄而言孔子周遊不當至楚應昭王之聘而秦穆之霸西戎孔子刪定之時不應以其誓列於周書之後矣蓋從來華夷之說乃在晉宋六朝偏安之時彼此地醜德齊莫能相尙是以北人詆南爲島夷南人指北爲索虜在當日之人不務修德行仁而徒事口舌相譏已爲至卑至陋之見今逆賊等於天下一統華夷一家之時而妄判中外謬生忿戾豈非逆天悖理無父無君蜂蟻不若之異類乎且以天地之氣數言之明代自嘉靖以後君臣失德盜賊四起生民塗炭疆圉靡寧其時之天地可不謂之閉塞乎本朝定鼎以來掃除羣寇寧宇乂安政教興修文明日盛萬民樂業中外恬熙黃童白髮一生不見兵革今日之天地清寧萬姓沾恩超越明代者三

尺之童亦皆洞曉而尙可謂之昏暗乎夫天地以仁愛爲心以覆載無私爲量是以德在內近者則大統集於內近德在外遠者則大統集於外遠孔子曰故大德者必受命自古帝王以來其揆一也今逆賊等以冥頑狂肆之胸不論

天心之取舍政治之得失不論民物之安危疆域之大小徒以瑣瑣鄉曲爲阿私區區地界爲忿嫉公然指斥以遂其昧棄彝倫滅廢人紀之逆意至於極盡狂吠之音竟敢指天地爲昏暗豈

皇皇上天鑒觀有赫轉不如逆賊等之智識乎且逆賊呂畱良等以夷狄比於禽獸未知

上天厭棄內地無有德者方

眷命我外夷爲內地主若據逆賊等論是中國之人皆禽獸之不若矣又何暇內中國而外夷狄也自詈乎詈人乎且自古中國一統之世

幅員不能廣遠其中有不向化者則斥之夷狄如三代以上之有苗荆楚獫狁卽今湖南湖北山西之地也在今日而目爲夷狄可乎至於漢唐宋全盛之時北狄西戎世爲邊患從未能臣服而有其地是以有此疆彼界之分自我朝入主中土君臨天下并蒙古極邊諸部落俱歸版圖是中國之疆土開拓廣遠乃中國臣民之大幸何得尙有華夷中外之分論哉從來爲君上之道當視民如赤子爲臣下之道當奉君如父母如爲子之人其父母卽待以不慈尙不可以疾怨忤逆況我朝之爲君實盡父母斯民之道殫誠求保赤之心而逆賊尙忍肆爲訕謗則爲君者不知何道而後可也從前康熙年間各處奸徒竊發動輒以朱三太子爲名如一念和尚朱一貴者指不勝屈近日尙有山東人張玉假稱朱姓託於明之後裔遇星士推算有帝王之命以此希冀鼓惑愚民現被步軍統領衙門拏獲究問從來異

姓先後繼統前朝之宗姓臣服於後代者甚多否則隱匿姓名伏處草野從未有如本朝奸民假稱朱姓搖惑人心若此之眾者似此蔓延不息則中國人君之子孫遇繼統之君必至於無噍類而後已豈非奸民迫之使然乎況明繼元而有天下明太祖卽元之子民也以綱常倫紀言之豈能逃篡竊之罪至於我朝之於明則鄰國耳且明之天下喪於流賊之手是時邊患肆起倭寇騷動流賊之有名目者不可勝數而各村邑無賴之徒乘機劫殺其不法之將弁兵丁等又借征剿之名肆行擾害殺戮良民請功以克獲賊之數中國民人死亡過半卽如四川之人竟至靡有孑遺之歎其偶有存者則肢體不全耳殘鼻缺此天下人所共知康熙四五十年間猶有目覩當時情形之父老垂涕泣而道之者且莫不慶幸我朝統一萬方削平羣寇出薄海內外之人於湯火之中而登之衽席之上是我朝之有造於

中國者大矣至矣至於厚待明代之典禮史不勝書其藩王之後實係明之子孫則格外加恩封以侯爵不亦前代未有之曠典而胸懷叛逆之奸民動則假稱朱姓以爲構逆之媒而呂留良輩又借明代爲言肆其分別華夷之邪說冀遂其叛逆之志此不但爲本朝之賊寇實明代之仇讐也且如中國之人輕待外國之人承大統者其害不過妄意詆譏蠱惑一二匪類而已原無損於是非之公倫常之大儻若外國之君入承大統不以中國之人爲赤子則中國之人其何所託命乎況撫之則后虐之則仇人情也若撫之而仍不以爲后殆非順天合理之人情也假使爲君者以非人情之事加之於下爲下者其能堪乎爲君者尚不可以非人情之事加之於下豈爲下者轉可以此施之於上乎孔子曰君子居是邦也不非其大夫況其君乎又曰夷狄之有君不如諸夏之亡也夫以春秋時百里之國其大夫

猶不可非況我朝奉

天承運大一統太平盛世而君上尙可謗議乎且聖人之在諸夏猶謂夷狄爲有君況爲我朝之人親被教澤食德服疇而可爲無父無君之論乎韓愈有言中國而夷狄也則夷狄之夷狄而中國也則中國之歷代以來如有元之混一區宇有國百年幅員極廣其政治規模頗多美德而後世稱述者寥寥其時之名臣學士著作頌揚紀當時之休美者載在史冊亦復燦然俱備而後人則故爲貶詞槩謂無人物之可紀無事功之足錄此特懷挾私心識見卑鄙之人不欲歸美於外來之君欲貶抑掩沒之耳不知文章著述之事所以信今傳後著勸戒於簡編當平心執正而論於外國人承大統之君其善惡尤當秉公書錄細大不遺庶俾中國之君見之以爲外國之主且明哲仁愛如此自必生奮勵之心而外國之君見是非之不爽信直道之

常存亦必愈勇於爲善而深戒爲惡此文藝之功有補於治道者當何如也儻故爲貶抑淹沒略其善而不傳誣其惡而妄載將使中國之君以爲既生中國自享令名不必修德行仁以臻郅隆之治而外國人承大統之君以爲縱能夙夜勵精勤求治理究無望於載籍之褒揚而爲善之心因而自怠則內地蒼生其苦無有底止矣其爲人心世道之害可勝言哉況若逆賊呂留良等不惟我朝之善政善教大經大法槩爲置而不言而更鑿空妄撰憑虛橫議以無影無響之談爲惑世誣民之具顛倒是非紊亂黑白以有爲無以無爲有此其誕幻譎張誑人聽聞誠乃千古之罪人所謂愍不畏死凡民罔不憝不待教而誅者也非祇獲罪於我國家而已此等儉邪之人胸懷思亂之心妄冀僥倖於萬一曾未通觀古今大勢凡首先倡亂之人無不身膏斧鑕遺臭萬年夫以天下國家之鞏固豈烏合鼠竊之輩所

重刊安微通志卷五
能輕言動搖卽當世運式微之時其首亂之人歷觀史冊從無有一人能成大事者如秦末之陳涉項梁張耳陳餘等以至元末之劉福通韓林兒陳友諒張士誠等雖一時跳梁究竟成爲灰燼而唐宋中葉之時其草竊之輩接踵疊跡亦同歸於盡總之此等奸民不知君臣之大義不識天命之眷懷徒自取誅戮爲萬古之罪人而已夫人之所以爲人而異於禽獸者以有此倫常之理也故五倫謂之人倫關一則不可謂之人矣君臣居五倫之首天下有無君之人而尙可謂之人乎人而懷無君之心而尙不謂之禽獸乎盡人倫則謂人滅天理則謂禽獸非可因華夷而區別人禽也且天命之以爲君而乃懷逆天之意焉有不遭天之誅殛者乎朕思秉彝好德人心所同天下億萬臣民共具天良自切尊君親上之念無庸再爲剖示宣諭但儉邪昏亂之小人如呂畱良等胸懷悖逆者普天之下不可言止此

數賊也用頒此旨特加訓諭若平日稍有存此心者當問天捫心各發天良詳細自思之朕之詳悉剖示者非好辯也古昔人心淳樸是以堯舜之時都俞吁咈其詞甚簡逮至殷周之世人心漸不如前故殷盤周誥所以誥誡臣民者往復周詳肫誠剴切始能去其蔽錮覺其愚蒙此古今時勢之不得不然者每見陰險小人爲大義所折理屈詞窮則借聖人之言以巧爲詆毀曰是故惡夫佞者不知孔子之以子路爲佞因子路何必讀書然後爲學之語而發蓋以無理之論而欲強勝於人則謂之佞所謂禦人以口給也若遇呂畱良嚴鴻逵曾靜等逆天悖理惑世誣民之賊而曉以天經地義綱常倫紀之大道使愚昧無知平日爲邪說陷溺之人豁然醒悟不致遭天譴而罹國法此乃爲世道人心計豈可以謂之佞乎天下後世自有公論著將呂畱良嚴鴻逵曾靜等悖逆之言及朕諭旨一一刊刻通行頒布

重修安徽通志卷六
天下各府州縣遠鄉僻壤俾讀書士子及鄉曲小民共知之並令各
貯一冊於學宮之中使將來後學新進之士人人觀覽知悉儻有未
見此書未聞朕旨者經朕隨時察出定將該省學政及該縣教官從
重治罪特諭

重修安徽通志卷六

皇言紀

高宗純皇帝詔諭

雍正十三年

奉

天承運

皇帝詔曰惟我國家受

天眷命

太祖

太宗創垂基緒

世祖統一萬邦

皇祖聖祖仁皇帝享祚久長重熙累洽我

重修安徽通志

卷六

皇考大行皇帝紹承大統御宇十有三年夙夜憂勞勤求郅治用康乂我億兆臣民盛德豐功炳耀寰宇恩膏洋溢漸被八紘薄海時雍中外蒙福方期永綏隆祚仰荷鴻禧何意奄棄臣黎遽升

龍馭以

宗廟

社稷之重屬於藐躬朕自冲齡即蒙

皇祖撫育宮中深恩鍾愛瞻瞻逾常

皇考顧復恩勤

聖慈篤摯瞻依朝夕祇受

誨言爰迪有加

宸衷默眷朕自惟涼德懼弗克勝顧念神器不可久虛勉抑哀衷欽遵

成命於九月初三日祭告

天地

宗廟

社稷即皇帝位以明年為乾隆元年仰惟

上天篤祐之隆

皇考詒謀之重撫躬乾惕祇紹

前徽不布新恩聿昭錫類所有合行事宜條列於左

上諭各省民欠錢糧十年以上者已於恩詔內概予蠲免其餘未完民

欠尚係應徵者朕思繼緒方初惟當繼述我

皇考惠養黎元之至意俾服疇力穡之人均沐恩膏積逋全釋若未蠲

之項尚事徵收民間不無煩擾茲特再行降旨於恩詔外將雍正十

二年以前各省錢糧實欠在民者一併寬免從前江南積欠錢糧內

曾有官侵吏蝕二項乃從民欠中分出者比時差往大臣官員辦理

原不妥協亦著照民欠例寬免此朕仰體

皇考誠求保赤之仁深願吾民厚生正德之意各省軍民人等身受國恩至渥自應感動天良屏除陋習明守法奉公之大義循則壤成賦之常經共爲良民免追呼之擾累儻疲玩性成不知悛改則是吾民中最爲愚頑之人既無畏威之念亦鮮懷德之心國法具在朕亦不能爲之寬貸也爾等卽交部遵行

上諭從來帝王撫育區夏之道惟在教養兩端蓋天生民而立之君原以代天地左右斯民廣其懷保人君一身實億兆羣生所託命也書稱正德利用厚生惟和又云惟土物愛厥心臧蓋恆產恆心相爲維繫倉廩實而知禮義理所固然則夫教民之道必先之以養民惟期順天因地養欲給求俾黎民飽食暖衣太平有象民心自順民生優裕民質自馴反樸還淳之俗可致庠序孝弟之教可興禮義廉恥之

心可敦也我朝

列聖敬

天勤民垂統萬世

皇祖聖祖仁皇帝六十餘年久道化成重熙累洽所以惠養元元禮陶樂淑者至周至備惟是國家承平日久生齒日繁在京八旗及各省人民滋生蕃衍而地不加廣此民用所以難充民產所以難制也我皇考宵旰孜孜勤求治理惟恐一夫不獲其所重農貴粟之教屢頒撫循蠲賑之惠頻下南北之營田水利無不興修內外之開墾種植無不綜理凡此實政實心一以誠敬貫徹始終十三年有如一曰皆朕所親承目覩拳拳服膺者也朕生長深宮瞻依

皇考慈顏惟知承歡膝下懋學書齋卽如日用衣食之需悉由恩賜豐贍饒裕不煩問所從來此固

皇考昊天罔極之恩難以明言而爲君之難亦惟身履其地者然後知聖人之言爲至當也今朕繼承大統身爲人主衣租食稅則自今始一絲一粟皆四海小民所經營供御者矣朕思飲饌被服皆出自海內脂膏宮室器用皆取自閭閻拮据尙安忍少有糜費侈用之心以傷民力而耗民財乎又安忍已垂裳而聽天下之民有寒不得衣已玉食而聽天下之民有飢不得食者乎禹思天下有溺者由己溺之稷思天下有飢者由己飢之自古聖君賢臣自任之重者皆動於至誠迫於至理有萬不容已者也朕日夜兢兢時塵本固邦寧之至慮以

皇考之實心爲心以

皇考之實政爲政凡供膳品味之類無所加增衣服器用之屬無所濫費宮室苑囿之區無所改營爰賴中外諸臣其體朕心以成朕志於

民生日用所由阜成民生樂利所由豐豫之處在在求其實濟事事謀其久遠勿以虛文而澤不下逮勿以小利而計不圖全勿作無益以害有益勿朘民生以厚己生果能恆產有資將見恆心自啟

皇考聖訓所謂三代之治必可復堯舜之道必可行者庶能繼述萬一此朕中心乾惕之誠並非因卽位之初爲此邀譽近名之語以博天下臣民之感頌朕心務收實效豈肯徒託空言但天下至大兆民至衆非朕一人所能獨理內而閣部八旗大臣外而督撫藩臬有司均受國家深恩有惠養斯民之責者當共思黽勉崇儉戒奢視國事如家事以民身爲己身痲痺一體休戚相關各殫誠心期登斯民於衽席則賞功酬庸之典朕必從優舉行若苟且因循視同膜外律以溺職更復何辭勉之特諭

上諭據果親王密奏江南等省漕項蘆課及學租襍稅等銀亦係雍正

十二年以前之民欠似可照例豁免特行請旨等語朕思此等欠項實係應免者果親王分晰詳明據實陳奏甚屬可嘉著全行豁免並令嗣後遇有恩詔俱將各項入於豁免之內永著爲令果親王秉性忠直辦理部務悉本公心是以蒙

皇考深知優獎推誠信任而王亦不屑以寬慈邀譽是以外間或有嚴厲之疑皆不知王之居心者又或有司員奉行不善之處亦未可定實與王無預今觀密奏蠲免漕蘆等項舊欠一摺則王存心寬厚辦事公明卽此可見著將原奏及朕此旨宣示九卿共知之

上諭江南江西湖廣等省正供錢糧款內有蘆課一項凡蘆洲俱係沿江沙灘坍漲靡定是以定例五年一丈量令地方官勘踏新舊坍塌漲沙地據實報聞而不肖官吏往往借此納賄行私已坍之地不得豁免除正賦新漲之區反可脫漏升科此種積弊甚爲民害嗣後屆期丈

量著該督撫於通省道員內選廉能夙著者率同該州縣官履畝清查凡有盈縮俱按現在實數升除毋使漏課亦毋使賠糧其不肖官吏或尚有借端需索等弊卽行指名參處不得姑容徇庇自干咎戾

特諭

上諭比來殷富之家有願出己財以賑恤鄉里者卽周官五黨相賙通財救荒之遺意是以

皇考恩賜議敘以鼓勵風俗而又恐因是或滋弊端於本年五月間山西巡撫石麟奏稱太原府紳衿士民捐銀貯公以備周恤一摺

特降諭旨以爲好義樂施者大都由地方之水旱饑饉捐資賑助卽平常無事時或置義倉義田及養老育嬰等事必出於本人之誠心而又能親身料理始可以惠鄉閭而收實效石麟於地方現無應辦之事而乃奏紳衿士民捐銀以備公用直是另開捐納之條而胥吏士

重修安海通志 卷六
三
豪乘此得以侵蝕與所降原旨不合曾經嚴加申飭並令向後不得無故捐銀交官是

皇考於獎誘善良之中而預防其流弊至深且悉也朕觀各直省捐助一事或督撫欲博化民善俗之譽授意屬員或有司欲邀勸輸宣力之名多方迎合竟至抑勒誅求計家資之豐約定捐輸之多寡甚至假公苛斂中飽侵漁名曰利民而適以病民誠有如此

皇考諭旨中所慮及者嗣後各州縣如遇荒歉及修城築隄公事果有殷實良民實情樂輸者許親赴布政司具呈詳請題奏地方官不得自行申報其他如倡立義田義倉義學義冢許具呈本州縣詳報上司立案仍聽本人身自經管胥吏土豪不得干涉希圖漁利該督撫體公核實大者題請小者量行旌獎儻有官吏勒派該督撫失察並有徇庇者均照例分別處分至於道不拾遺蓋以孔子至聖德盛化

神所治僅蕞爾之魯故偶一有之成康之際周召輔治百度修明刑措四十餘年不聞有此則非人情所常有之事而政治之美不徒恃此子子之小義可知矣近見諸督撫以此陳奏者漸多若不加禁遏恐滋奸民邀賞有司干譽之弊諸督撫果能實心體國子育蒸黎休養導化使衣食滋殖仁讓相先太平之象自有蘊蒸而不可掩者亦不在道不拾遺之一節也嗣後即果有此該州縣量行獎賞不得申詳該督撫亦不得以此陳奏特諭

上諭江南太平府蕪湖縣雜派糧銀即行寬免

恭紀食貨志蠲賑

上諭朕即位之初加恩海內民人已降旨將雍正十二年以前各省民欠錢糧悉行蠲免俾閭閻無催科之擾因查兩淮鹽場竈戶應徵折價錢糧亦有未完之項當與民人一體加恩者著該部即速傳諭總督趙宏恩鹽政高斌將雍正十二年以前舊欠若干一一查明照地

重刊安撫通志 卷六
丁錢糧例奏聞蠲免俾竈戶均霑實惠毋使胥吏滋弊中飽恭紀食貨志蠲賑

上諭向來州縣徵收錢糧因銀色有傾銷之耗折解送有路途之盤費故於正項之外徵收耗羨原無定額其廉潔者尚知自愛不肖者任意徵求而督撫以至道府等員於中收受節禮陋規互相容隱弊難究詰嗣經巡撫諾岷田文鏡倡為提解歸公之法各該督撫就本省情形酌定分數徵收以為各官養廉及地方公事之用除所定分數外絲毫不許濫徵蓋以耗羨原屬額外之項與其聽地方官私行徵取不如明定分數使有節制不敢違越也然在未提解以前倘為私項既提解以後或恐不肖官員視同正課又得於耗羨之外巧取殃民從前

皇考洞見流弊屢降諭旨欲俟將來虧空全清府庫充裕之日漸減漸

革

聖心塵念未或忘之朕紹承大統念切民依孜孜軫恤日與王大臣等悉心籌畫期使吾民於正項之外絲毫無擾而一時勢有未能尚需從容計議惟是提解耗羨之法行之已十有餘年恐日久弊生奸吏夤緣朘削耗外加耗重困閭閻不可不為深慮著各該督撫嚴飭有司咸體朕意知耗羨一項可減而決不可增可於額內從寬而斷不可於額外多索儻於所定分數之外或又借估色或又借添數為名多取絲毫者該督撫即行題參重治其罪儻督撫徇隱不舉或經科參定將該督撫等一併嚴加議處再各省耗羨分數率在加一上下然江南賦重之區如蘇松常鎮四府額賦較之他省幾及數倍雍正六年以前每兩加耗僅止五分雍正六年以後增至加一且有司又復巧取苛索民何以堪其令江南督撫詳加酌定量減分數徵收不

得仍前重耗困民儻敢陽奉陰違朕必於該督撫是問特諭

上諭向來漕項銀兩不在蠲免之例朕前已降旨特行豁免以紓民力今查各省尚有帶徵漕米原應如期輸納但民間已完現年漕米又完先年畱米民力未免艱難著該部傳諭辦漕各省督撫等將雍正十二年以前未完帶徵緩徵本色改折銀米逐一查明奏聞豁免

食貨志

旨豁免直隸江蘇安徽浙江河南山東等省

上諭江南太平縣襍派錢糧永行免納

上諭朕臨御以來加惠元元將雍正十二年以前各省民欠錢糧悉行

寬免誠以民為邦本治天下之道莫先於愛民愛民之道以減賦蠲租為首務也惟是輸納錢糧多由業戶則蠲免之典大概業戶邀恩者居多彼無業貧民終歲勤動按產輸糧未被國家之恩澤尚非公

溥之義若欲照所蠲之數履畝除租繩以官法則勢有不能徒滋紛擾然業戶受朕惠者十苟捐其五分惠佃戶亦未為不可近聞江南已有嚮義樂輸之業戶情願捐免佃戶之租者閭閻興仁讓之風朕實嘉悅其令所在有司善為勸諭各業戶酌量寬減彼佃戶之租不必限定分數使耕作窮民有餘糧以贍妻子若有素封業戶能善體此意加惠佃戶者則酌量獎賞之其不願者聽之亦不得勉強從事此非捐修公項可比有司當善體朕意虛心開導以興仁讓而均惠澤若彼刁頑佃戶藉此觀望遷延則仍治以抗租之罪朕視天下業戶佃戶皆吾赤子恩欲其均也業戶沾朕之恩佃戶又得拜業戶之惠則君民一心彼此體恤以人和感召

天和行見風雨以時屢豐可慶矣特諭

乾隆元年

上諭為治之道在乎休養生民而民之所以休養在乎去其累民者使其心寬然自得以各謀其生各安其業而後富足可期此在親民之吏隨事體察惟恐毫末有累於民而已朕思我

皇考世宗憲皇帝誠求保赤有孚惠心蠲免額徵寬減浮糧偶有水旱災祲卽行賑恤如救焚拯溺仁心仁政千載莫並而民生猶不得寬裕者大率由督撫大臣不能承宣德意而有司中刻覈居心昏庸寡識者或以苛察為才能或受蔽蒙而不覺以致累民之事往往而有也卽如催徵錢糧而差票之累數倍於正額拘執獄訟而株連之累數倍於本犯抽分關稅而落地守口給票照票貧民之受累數倍於富商至查拏賭博黃銅以及私宰私鹽之類胥役營兵因緣為奸佐貳雜職橫肆貪酷一案而化為數案一人而波及數人如此等者不可枚舉似此擾累吾民無怪乎民多不得自安其生業而朝廷之德

施終不能盡致閭閻於康阜也嗣後各直省督撫所以董率屬員者務以休養吾民為本而一切擾累之事速宜屏除庶民生可遂而民氣以舒然督撫中之不善會朕旨者又恐因此而謂諸事可以不辦將轉成廢弛之習不知寬大之與廢弛判然不同不顧民生專務紛更以矜幹濟者外似振作而實則廢弛也勤卹民隱安靜悃悃以培元氣乃非廢弛而真能振作也其尙各體朕意欽此謹增

上諭私鹽之禁所以除蠹課害民之弊恭紀食貨志鹽法謹增

上諭朕聞姦宄不鋤不可以安善良風俗不正不可以興教化閭閻之大惡有四一曰盜賊三代聖王所不待教而誅者也二曰賭博干犯功令貽害父兄以視周官之罷民未麗於法而繫諸嘉石收之園土者罪有甚焉三曰打架卽周公所謂亂民孟子所謂賊民也四曰娼妓則自周以前人類中未嘗有此此四惡者劫人之財戕人之命傷

人之肢體破人之家敗人之德爲善良之害者莫大於此是以我
皇考愛民之深憂民之切嚴申糾禁戒飭守土之官法在必行日夜捕
緝積歲月之久然後道路少響馬及老瓜賊而商旅以寧賭博及造
賭具者漸以改業而家室可安聚黨打架者斂跡而城市鄉鎮鮮聞
鬪囂娼妓不敢淹畱於客店此

皇考十有三年政教精神所貫注而海內臣民顯見其功效實享其樂
利者也朕自嗣位以來蠲免租賦豁除賠累裁革積弊增廣赦條無
非惠保良民使得從容休息衣食滋殖而無識諸臣誤謂朕一切寬
容不事稽察以致大小官吏日就縱弛民間訛言諸禁已開風聞直
省四惡皆微露其端倪卽如天津一帶私鹽橫行無忌恐其他類此
者相繼而起是守土之官敢悖

世宗憲皇帝之明旨墮十有三年之成功而戕賊善良傷敗風俗也自

後州縣官有政令廢弛使四惡復行於境內者該督撫不時訪察卽
行嚴參督撫司道郡守有不能董率州縣殫心捕治者或被內外臣
工核實列奏或朕訪聞得知必以溺職治罪與通苞苴受賄賂等決
不輕貸爾諸臣慎毋泄沓自取殃咎戒之戒之謹增

上諭朕聞泗州地方

恭紀食貨志蠲賑

上諭聞江南長江一帶向有貢獻鱗魚之例至康熙年間停止因而地
方改爲折價向網戶徵收解充地方公用乃歷年既久或網戶改業
或移徙他方展轉牽連又加胥吏借端苛索遂至沿江捕魚之人代
受追呼之累朕思當年

聖祖仁皇帝停止貢鮮乃愛惜民力之至意何用此些須折價煩擾小
民著該督撫查明豁免永著爲例

上諭聞江南佐雜等官向來未有養廉該省事務繁多差遣絡繹倍於

他省微員俸少力薄未免衣食艱難查江蘇有不充餉之鹽規銀兩

安徽司庫有存公耗羨銀兩著總督趙宏恩巡撫顧琮趙國麟公同

查核做照江西湖廣之例酌定數目每年賞給以為養廉示朕體恤

微員之至意

部議查江蘇省微員內教職驛丞二項所領俸薪尚堪支持似可毋庸議給其布按糧道及各府首領各州縣佐貳職等官共二百五員內蘇州府經歷管轄社壇通州州年養廉銀八十兩此外三百員酌議每員各給養廉六十兩計三百員每年需養廉銀一萬八千三百四十兩查鹽規解司時有遲早養廉計日待需請將存公耗羨通融抵放就各員附近州縣徵收耗羨銀內自奉旨之日為始按月坐支統俟歲底歸款報銷

上諭朕聞江南江西湖廣地方襟江帶湖廣表數千百里設立塘汛所

以衛商民防盜賊也近訪得不肖兵丁疏懶廢弛養盜貽患受其規

禮分其贓物為之聲援嚮導及細求其故多因兵丁攜帶家口安土

重遷與地方奸匪往來熟識以致事前無忌事後無蹤放膽遊行竟

成盜賊之淵藪夫汛兵頻數更替出其不意則與賊無從結識有縱

盜之咎無夥賊之利亦何樂乎為此顧任其挈妻孥飽谿壑萑苻多

警鈴柝空存徒法不能以自行非此之謂歟朕又聞江岸湖邊船隻

成羣任意攬載奸良莫辨商民被劫所在多有雍正五年定例令地

方官取具船戶鄰佑保結編列號次刊刻姓名給以印照不時稽查

而漁船出沒無常藏奸更易亦依陸地保甲之法許以公首懲以連

坐乃日久怠忽總不奉行夫兵弁竭力防緝則盜賊不致蔓延船戶

隨在清查則盜賊無由混襍然必須封疆大吏刻刻留心時時察訪

規條賞罰整肅嚴明方能著有成效至汛兵更替之法尤當因地制

宜俾兵丁得顧其室家而地方仍資其防備是又在封疆大臣實心

區畫善為經理不徒在文告之虛辭也著各該省督撫悉心詳議奏

聞特諭

重刊安徵通志 卷六
上諭朕聞河南永城縣地方於本年四月內黃水忽發從江南碭邑之毛城鋪舖口洶涌南下將申公隄祝家水口衝坍並東首古隄亦衝二缺潘家道口等集一帶平地水深三五尺不等雖未損傷人口而二麥被淹房屋亦有傾圮者朕已切諭豫省巡撫等將被水民人加意賑恤毋令失所外查潘家道口一帶地方年來屢遭水患自應亟爲疏通爲安百姓之計但此水下流多在江南蕭宿靈虹睢寧五河等州縣今若止議挑濬上源而無疏通下流之策則水無歸宿之區仍於河渠無所裨益著河南巡撫富德會同江南總督總河各委賢員會勘明確公同妥議速行辦理務令水害永除閭閻安堵以副朕爲民除患之至意

上諭朕夙夜孜孜任賢圖治惟期內外大小臣工共砥廉隅以襄郵理今列茲庶位者讀書科目之人不少正宜宣力國家以副朕望乃人品不齊拜官除職之際竟有不念官守之當如何而盡政事之當如何而舉輒咨問於缺地之豐嗇計較於養廉之多寡者士大夫聞之恬不爲怪良可慨歎抑或身任繁要而致羨於優閒或位列清華而垂涎於豐膺豈先資拜獻者之所宜出此哉董子曰正其誼不謀其利明其道不計其功士人稽古入官當以遠大自期安可謀食懷居甘自菲薄且朝廷設官各有分司惟當各盡職守主錢穀者必謹出納之數理刑名者必諳律例之條大僚有恭儉惟德之思一命有存心愛物之志豈可萌出位願外之妄想自曠當官之職業列爲諸臣者務宜痛自警省精白乃心靖共爾位不負讀書二字嚴義利之辨立廉恥之防庶幾風俗古而人心端斯吏治清而民生厚朕實有深望焉

上諭上下兩江及江右鄉村五六月間連值陰雨山水驟漲有水淹處

所據各該撫奏報朕已批諭速行賑恤安插今據總督趙宏恩將各被水情形具摺彙奏朕又批令督率屬員盡心賑恤務使災黎得沾實惠朕思江南江西被水鄉村雖係連陰驟漲止屬近山近水之區然被災之家俯仰無資甚可憐憫所當加意撫綏毋令少有失所其水勢旋即消退之地固可補種雜糧而低窪積水之田不能補插秧苗者更宜確加查勘酌免本年額賦至房舍量加修葺籽粒應否給助之處俱著悉心料理以副朕愛養元元至意

上諭從來經學盛則人才多人才多則俗化茂恭紀學校志

上諭書院之制所以導進人才廣學校所不及我

世宗憲皇帝命設之省會發帑金以資膏火恩意至渥也古者鄉學之秀始升於國然其時諸侯之國皆有學今府州縣學並建而無遞升之法國子監雖設於京師而道里遙遠四方之士不能胥會則書院

即古侯國之學居講席者固宜老成宿望而從遊之士亦必立品勤學爭自濯磨俾相觀而善庶人才成就足備朝廷任使不負教育之意若僅攻舉業已為儒者末務况藉為聲氣之資游揚之具內無益於身心外無補於民物即降而求文章成名足希古之立言者亦不多得寧養士之初指耶該部即行文各省督撫學政凡書院之長必選經明行修足為多士模範者以禮聘請負笈生徒必擇鄉里秀異沈潛學問者肄業其中恃才放誕不羈之士不得濫入書院中酌放朱子白鹿洞規條立之儀節以檢束其身心俾分年讀書法予之程課使貫通乎經史有不率教者則擯斥勿留學臣三年任滿諮訪考檢如果教術可觀人才興起各加獎勵六年之後著有成效奏請酌量議敘諸生中才器尤異者准令薦舉一二以示鼓舞特諭

上諭史書詳志河渠經術兼明水利誠以國計民生所關也果使水道

疏通脈絡流注陂澤非沮洳之藪隄防有蓄洩之方旱澇有備而田廬無虞其有裨於閭閻誠非淺鮮我

皇考軫恤黎元興行水利凡直省泉源河湖莫不濬導俾民得以灌溉轉瘠爲腴至於蘇松之太湖吳淞白茆劉湖歸海要道並淮揚之槐子烏塔河泰州如臬運河串場車路海溝等河尤不惜帑金專員督理將各河故道或爲豪彊侵占者諭令嚴查清出始得一一開通建牖築隄按時啟閉使近水田畝均沾膏澤貨船鹽艘過行無阻利賴甚溥但自開濬以來已越數年圩岸不無坍塌積沙泥不無淤積朕思與其歲久濬築事難費倍不若逐年疏葺事易費省著江南督撫暨河道總督令管理水利河務各官及濱河州縣各於所屬境內相視河流淺阻每歲農隙募夫挑挖定爲章程逐年舉行必令功施可久惠濟生民毋得視爲具文玩誤工作及陽奉陰違絲毫擾累特諭

上諭各省學政有衡文育才之責關係綦重從前各賞養廉資其用度俾得堅持操守砥礪廉隅衡鑒公明共襄國家作人之鉅典天下人文繁盛應試眾多者莫如江南而江南學政養廉江蘇二千兩安徽一千五百兩較他省爲少以此養贍家口延致幕賓未免不敷所當加恩體恤者著從今秋爲始上下兩江學政養廉各賞銀四千兩使伊等用度從容益得盡心於職業以副朕任官課士之至意

乾隆二年

上諭豁免安徽未完地丁米穀

恭紀食貨志蠲賑

上諭上下兩江雨澤愆期收成歉薄

恭紀食貨志蠲賑

乾隆三年

上諭各省地方偶有偏災朕查蠲免錢糧舊例被災十分者免錢糧十分之三八分七分者免十分之二六分者免十分之一雍正年間我

皇考特降諭旨凡被災十分者免錢糧十分之七九分者免十分之六八分者免十分之四七分者免十分之二六分者免十分之一實愛養黎元軫恤民隱之至意也朕思田禾被災五分則收成僅得其半輸將國賦未免艱難所當推廣

皇仁使被災較輕之地畝亦得均沾恩澤嗣後著將被災五分之處亦准報災地方官查勘明確蠲免錢糧十分之一永著為例

上諭江南地方今年五月雨澤短少六月雖經得雨未能霑足朕心甚為憂慮已屢降諭旨令該督撫預為籌畫悉心經理今思冬月即徵收漕糧之時田畝既苦歉收則官糧難以輸納著該督撫出示暫停徵收將是否成災及成災分數逐一確查其成災者自應照例題請豁免即不成災之處收成既薄需米孔殷亦應照雍正十二年之例每米一石折銀一兩徵收計算此時米價在小民辦納已省一半之

費而地方多留米穀於民食又大有裨益該部可即速行文諭江南督撫知之

上諭從前頒發

聖祖仁皇帝御纂經史諸書交直省布政使敬謹刊刻准人刷印恭紀學校志

上諭士子於書藝之外當令究心經學恭紀學校志

上諭朕思惠養斯民之道以輕徭薄賦為先凡各省田糧偶有些微偏重之處悉已陸續查明豁免以紓民力今查得安徽所屬懷遠衛軍田十三頃每畝徵銀八分八釐零又田二頃每畝徵銀六分二釐零較之民田未免稍重著照蒙城縣民田之例每畝徵銀二分一釐零共免銀九十八兩八錢七分又平武衛軍田五千二百九十一頃每畝加徵銀七釐三毫零除現在禁衛田之私典等事案內每畝應留

贍運銀一釐七毫外每畝著減去加徵銀五釐五毫零其免銀二千九百六十二兩六錢五分該部卽遵諭行文該督撫從乾隆三年爲始永著爲例

乾隆四年

上諭朕念切民生時廩宵旰或各省督撫陛見或遇司道各員請訓務以編氓疾苦備悉諮詢惟期海寓蒼生培固元氣上年直隸江蘇安徽三省

上蒼示警遂使吾民有乏食之虞朕甚憫焉今年幸賴

上蒼恩佑各省春雨頗周足資耕種重念三省之民幸有以安其心尙未能復其舊其被災處所旣已蠲賑頻施屢頒諭旨茲當開徵之期在被災者固屬艱難而未被災之地同在一省雖有輕重之分而乏食受困則一用是特頒諭旨將直隸總督所屬今年地丁錢糧蠲免

九十萬兩蘇州巡撫所屬今年地丁錢糧蠲免一百萬兩安徽巡撫所屬今年地丁錢糧蠲免六十萬兩該督撫務將朕旨家喻戶曉俾閭閻均受實惠庶幾和氣致祥以仰答

上天之恩以培民生之本儻有貪官汗吏借端苦索或私行徵收者該撫不時查參該部卽遵諭行

上諭南方號稱水鄉長江大湖洪濤巨浸每遇風浪驟發人力難施向有設立救生船之處每年頗多救濟但恐經費不足則爲數無多而稽查未周則爲善不力著各省督撫確查所屬地方有險阨之處應設救生船隻者酌動存公銀兩估計修造每年給與水手工食若干並交與地方官載入交盤冊內永遠遵行毋許始勤終怠

乾隆五年

上諭朕聞江省歲額錢糧地丁漕項蘆課襍稅之外又有名爲襍辦者

恭紀食貨

恭紀選

上諭大學士九卿等

舉志

乾隆七年

上諭數月以來雨澤稀少朕宵旰靡寧虔誠祈禱雖得微雨未為霑足從前因天時亢旱會降旨清理刑獄今著刑部將在部各案內有牽連待質者及輕罪內情有可原者或應省釋或應末減會同都察院大理寺悉心詳查妥議具奏至於直隸山東江南三省目下雨暘不均亦著照此例行嗣後各省如遇災眚之年著該督撫將清理刑獄之處奏聞請旨

部議軍流以下人犯除情罪較重仍照原擬治罪外情稍可原者軍流照名例三流減徒律減為杖一百徒三年徒罪均減為各杖一百至軍流徒罪折枷號人犯並原犯枷號人犯與杖笞鞭責罪輕人犯悉行省釋其減免人犯內有例應追賊刺字遞解管束者仍照例分別追賊刺字遞回籍安插收管至現在行查未覆及纜經到部未及審結者既事在欽奉恩旨以前應於審結之日如係枷杖輕罪仍行寬免如係軍流徒罪及折枷人犯即於彙題內聲明分別減免

請旨

上諭上下兩江淮徐鳳穎等所屬州縣屢被水災今年水勢更大朕心時切憂勞多方籌畫期登斯民於衽席此等被災地方州縣官最關緊要必須忠誠惻怛實有與民休戚相關之意而其才具又能展布設施者俾得久於其任方能於地方有益若徒以才具見長而無實心為民之念雖致飾於外而於撫恤之義又何補乎著該督撫畱心察看如現在各員果能勝任令其加意經理以觀成效如有不能勝任者或於通省屬員揀選補授或於命往江南人員內揀選題補苟得其人即令久於其地不必速升漢之賢能二千石有賜級賜金而不屢遷者其道猶可法也如此則瘡痍可起元氣可復庶慰朕痼瘵在抱之至意

上諭江南水災之後亟宜講因地制宜之策

恭紀河渠志

重修安徽通志

卷六

七

上諭上江鳳潁泗三屬連年被潦民困為甚著再借與口糧恭紀食貨志蠲賑

上諭拔貢十二年一舉恭紀選舉志

上諭大學士九卿恭紀選舉志

上諭各省常平倉穀每年存七糶三恭紀食貨志儲積

上諭江南水漲逾常著該督撫勘明被災各州縣分別具奏恭紀食貨志蠲賑

乾隆八年

上諭朕君臨天下愛養黎元拯災恤困夙夜孜孜惟思去其顛危登之衽席並望風俗茂美人心淳樸各葆天良以召和氣夫然而朕責始盡朕心始慰上年上江夏秋被水朕痡瘵念切蠲賑頻施特命大臣前往會同該督撫加意撫綏又令興修水利整理河防救目前之災荒弭將來之水患所費帑金以千百萬計而倉廩漕儲遠近接濟凡有關於民食者莫不移緩就急養欲給求所以體

上天仁愛之心盡父母斯民之道亦既殫宵旰之經營矣為士庶者當知國家恩恤已逾常格務令各安其本業共勸勉為馴良始無負朝廷勤恤民隱之至意乃聞各屬災民其實知感恩靜待給賑者固多而無知愚氓有以查賑稍遲聚眾強求者且有並未遲緩已得賑糧仍隨眾攀號希心分外者更有狡猾之徒本籍賑過即攜眷逃荒復赴鄰境畱養及至下月又奔回本籍領賑者甚而本非無業貧民串通胥吏混入賑冊或依藉聲勢冒濫與賑種種情弊層出不窮且沿途呼索男女混襍喧嘩悍潑罔顧廉恥而各屬生監藉有貧生一體賑恤之例即家非窮窶亦冀邀恩所求不遂即從中生事煽惑阻撓身列衣冠恬不知檢士習民風澆漓若此其有關於人心風俗實非淺鮮夫蠲除賑貸原係國家之恩澤各屬災民平時不知為未雨綢繆之計及遇荒歉復不思刻苦營生竟若仰食公家可忘儉歲甚且

不以荒歉爲可憂而以荒歉爲可幸因特沛之恩膏啟無窮之希冀本計不敷驕風日熾勢將何所底止習俗之漓莫此爲甚朕思德惟善政政在養民而厚生尤宜正德安聚之後化導爲先其地方有司雖有教民之責而刑名錢穀政務殷繁難以徧及卽學政教職衡文課士亦不能兼理民事必特設專員巡行整飭實心化導方有裨益著大學士等於翰林科道內揀選品行端謹通曉民事者四員授爲宣諭化導使馳驛前往江南以二員整理下江之淮徐揚海四府州以二員整理上江之鳳潁泗三府州令其親歷各屬鄉城計其道里巡行一徧周而復始所至之地傳其紳衿士庶宣講

聖諭廣訓反覆開導使知驕詐之習不難懲之以法念此無知之輩皆屬赤子朕心有所不忍務在感發其天良鼓動其廉恥俾明於大義務本安分則革其頑惰而薄俗可以還淳儻如此開導而猶怙過不

悛者卽加以罪夫復何辭奉差官員無得視爲具文虛應故事其儀制文移悉照各省學政之例給與欽差官員關防道府以下凡有關於宣諭化導者聽其節制其餘一切地方事務不得干預以專責成儻地方有司恃有宣諭化導使遂自怠其教民之職准宣諭化導使會同該督撫題參

上諭積貯乃民食所關

恭紀食貨志儲積

上諭國家子惠黎元教養由來並重朕君臨天下宵旰維勤重農桑輕徭賦所以養民者惟恐不周至於正人心厚風俗皆國之大務尤所時廛於懷者凡中外臣工莫不諄切誠諭務使民間習尙馴良訟獄衰息以漸臻風移俗易之效乃數年以來民風仍未還醇習俗每輕犯法豈小民之不可牖迪歟抑牧令之教化不浹而德意未孚也古者朝廷之政象魏懸書閭里之教月吉讀法三物六行匪徒具文我

聖祖仁皇帝聖諭十六條飭紀敦倫型方正俗精義超越前古

世宗憲皇帝萬言廣訓益加詳明愷切開導所以牖民覺世者至矣使地方有司竭誠宣布雖甚愚頑誰無天性亦必洗心滌慮革薄從忠駸駸於上理無如實力奉行者甚少即朔望宣講不過在城一隅附近居民聚集觀聽者僅數百人而各鄉鎮間有講約之所亦多日久廢弛全無實際至所奉諭旨有關於教民者亦惟張挂告示視為通行之常例焉能使之悅耳革心翻然悔悟是以尚氣輕生狃於性成作奸犯科常為俗染及其怙終不悛而刑罰隨其後朕甚憫之夫守令者民之父母古所稱忠信之長慈惠之師惟本至誠惻怛之意以感動愚民使之各自警省又能隨時隨事委曲勸誘諒無不可化誨之人亦無往而非敷教之地即聽訟一端兩造具在鄰佑親族齊集公庭正百姓耳目所屬推誠曉諭最易提撕不徒現犯者各自愧

悔並使旁觀者亦因此傳播交相勸勉若公事稍暇或講讀編審或勸課農桑即可單車減從親歷鄉村遇父老子弟獎其善良懲其不率申之以勸誠示之以榮辱循謹者益加鼓勵即強悍者亦知戒懲漸摩日久情性和順貪利好勝之心不作而一道同風之盛可幾矣惟是百姓以守令之行事為觀感守令以督撫之意指為從違為督撫者果能董率所屬潛心化導實力奉行日計不足月計有餘斷未有為其事而無其功者若徒視為虛文接到諭旨轉行牌示遂以為已經遵奉則亦何益之有各省督撫等受朕深恩畀以封疆重寄尙其儆惕黽勉以無負朕諄諄誥誡之至意

上諭江南淮揚徐鳳穎泗五府一州上年水災甚重恭紀食貨志蠲賑

上諭上年江南淮徐鳳穎等府遭值水災恭紀食貨志蠲賑

乾隆九年

上諭人君以養民爲急務養民之道在使之上順天時下因地利殫其經營力作以贍其食非沾沾於在上之補苴救恤遂長恃爲資生之策也在昔善圖國是者謂以君養民則不足使民自養則有餘誠不易之論國家歲輸漕粟以實京師乃備天庾之出納關係最重或因偶遇災歉萬不得已而爲截留之計僅可開一行之豈遂視爲常法今內外臣工動以截漕爲請朕念切民依亦屢次允從出於一時之急濟其實京倉所貯雖云可備五年可備十年要僅爲官俸兵糧所必需若統爲京師人民計卽一二年恐亦不足供支況欲更分此以賑貸直省何未之思也漢文景開太倉之粟陳陳相因至紅朽不可食彼時豈無一方之凶歉而未聞輕議分減者誠以經國之大計務籌久遠在官在民於內於外莫不各有本圖舍本圖而謀兼濟事多未便勢且不能一有虧則兩俱損伊古以來無取焉上年各省倉儲

需米孔亟朕因偶爾變通將江蘇安徽浙江江西湖北湖南六省漕糧各留十萬石於本省並著江蘇浙江各將米十萬石運往福建江西將米十萬石運往廣東又因直隸天津河間被災前後撥通倉米八十萬石備賑今年又令山東截留二十萬石分貯接濟凡此皆因民命所關不得不變通辦理若小民不知各務生計而惟官糧是賴無論官兵之外斷不能徧給窮黎卽近漕之處可以議截留其邊遠省分更無漕可截留又將何以議給乎朕思一方之地力原可以養一方之人一家之人力原可以養一家之人古者九職任萬民一曰三農生九穀二曰園圃毓草木三曰虞衡作山澤之材四曰藪牧養蕃鳥獸何一非資生養贍之術爲民父母民事卽家事宜實力勸課隨時區畫俾地無遺利民無遺力則家有蓋藏自可引養引恬俯仰不匱儻督撫不能董率有司有司復不以田里樹畜爲事及歛收之

重刊安徽通志卷六
年但請給發倉糧截留漕米爲督撫有司備賑之良策將使民間謂水旱可以不備不圖自食其力甚至游惰成風舉身家衣食之切務皆委之在官是非愛之實以害之矣天下之大億兆人民之眾惟正之供祇有此數焉得人人而濟之用是特降諭旨通諭直省督撫併飭守牧等官各思所督何事所撫何事所稱知府事知州知縣事實應知何事凡以爲國計卽所以爲身計而不使民知各爲其身計其能爲民計者幾何繼自今督撫當體朕心勿怠民事懇切開導併飭良有司務使百姓各知自謀以裕生養之源不徒望恩倖澤而恩澤之加斯實足以利濟則豐年樂其降康歉歲亦可恃無恐朕願與諸臣共勉之

乾隆十年

上諭我朝

列聖相承深仁厚澤無時不加意培養元元以期家給人足百年以來薄海內外物阜民康共享昇平之福朕臨御天下十年於茲撫育蒸黎民依念切躬行儉約薄賦輕徭孜孜於保治之謨不敢稍有暇逸常守節用愛人之訓凡以爲民也今寰宇敕寧旣鮮糜費之端亦無兵役之耗所有解部錢糧原爲八旗官兵及京員俸餉之所需計其所給較之宋時養兵之費猶不及十之一二至於各處工程爲利民之舉者取給於存公銀兩卽朕偶有巡幸賞賚所頒亦屬無幾是以左藏尙有餘積數年來直省偶有水旱朕加恩賑濟多在常格之外如前年江南被水撫綏安插計費帑金千餘萬兩凡此皆因災傷補救而沛恩澤者朕思海宇乂安民氣和樂持盈保泰莫先於足民況天下之財止有此數不聚於上卽散於下仰惟我

皇祖在位六十一年蠲租賜復之詔史不絕書又曾特頒

諭旨將天下錢糧普免一次我

皇考旰食宵衣勤求民瘼無日不下減賦寬徵之令如甘肅一省正賦全行豁免者十有餘年此中外所共知者朕以繼志述事之心際重熙累洽之候欲使海澨山陬一民一物無不均沾大澤為是特降恩旨將乾隆丙寅年直省應徵錢糧通行蠲免

上諭各省蠲免正賦之年若有未完舊欠著一併停徵恭紀食貨志蠲賑

乾隆十一年

上諭各省積儲原以備民間荒歉之用恭紀食貨志儲積

乾隆十二年

上諭昨據工部具奏蕪湖工關恭紀食貨志關權

乾隆十三年

上諭邇年以來各省米價日見加增恭紀食貨志儲積

上諭據舒輅奏稱上江各屬存貯節年未買糧價及本年糶價銀三十

七萬餘兩一時不能采買而頻年存貯州縣庫中將來恐不免於侵挪現在籌酌如倉額未足與存價少者俱令將價先行解貯該管府州之庫秋後領銀酌量采買其存價甚多倉穀未充一時不能買足者分別酌留應買之數外餘價俱行提解司庫等語舒輅如此辦理較為妥協朕前降旨各省倉穀俱照康熙雍正年間舊額其餘皆停止采買則所存穀價銀兩與其存留各州縣以啟侵挪之弊不如全解藩庫以備臨時動撥可傳諭各省督撫將所有未買糧價及平糶價銀可否照舒輅所奏提解司庫將來各州縣所有應用再從司庫請撥亦為妥便如康熙雍正年間舊額之內應行買補者其穀價仍存州縣以備酌量買補若舊額之外所餘糧價銀兩有必應需用之處准其分別酌留其餘悉令解司該督撫就各省形情悉心查辦仍

遵前旨一面將康熙雍正年間額數及現年實存糶借等項數目速行具奏應行動撥之處聽軍機大臣等會議此旨已經逾月各督撫

多未奏到甚屬遲延著傳諭令其速行奏聞
或未定額或定額無多間有極邊不近水次西甘肅沿邊積貯
年開舊額內惟雲南地處極邊不近水次西甘肅沿邊積貯
兼借軍糧各該省雍正年間倉貯多寡無定應以乾隆年間所
定之額為準又福建之環山帶海商販不通倉貯均宜充裕現在
產穀無幾貴州之跬步皆山不通舟楫倉貯均宜充裕現在
石照乾隆年間定額或多或少有不敷或僅可足額而較之雍正
間舊額頗覺有餘酌量三省情形請即以現存之數作為定額
其餘直隸江蘇江西湖北湖南山西廣西安徽浙江河南奉天
山東四川等省應悉以雍正年間舊額為準似此酌定額數通
計一十九省應貯穀三千三百一十九萬二千三百零七石零
較之乾隆年間定額四千八百一十一萬六千八百零七石零
減貯穀一千四百三十一萬八千八百一十九石零應令各督撫
屬大小均勻存貯其間有轉運之難出產之寡地方之督撫要
及提鎮駐劄處所並各省犬牙相入之處彼此可以協濟者均
應分別加貯再查乾隆年間加貯之數均未如數捐足且近年
各省賑恤撥運動輒數十萬即出借之處無多直隸江蘇江西
湖北湖南山西廣西安徽山東四川雲南西安福建廣東貴州

一十五省皆係額外有餘奉天浙江河南甘肅四省皆係額內
不足查額外有餘省分內除四川現辦軍糧山東西安賑務未
竣動存數日尚難確計外其餘直隸等一十二省現在實存穀
並米折穀共一千六百二十五萬八千六百八十二石零出借
並米折穀二千七百一十五萬七千零一石零平糶穀並米折
六十五萬八千八百一十五石零存價銀一百九十九萬五千
七十三兩零錢九萬五千七百五十六文今將實存並借糶
各數劃抵定額外約計溢額穀及以米折穀三千二百一十一
千一百七十七石零存庫糶價銀一百四十二萬八千一百
兩零又錢三萬六千二百三十二文零應令將現在溢額穀石
出借徵還餘贖穀石以次出糶報部其現在溢額糶價提貯司
庫報部酌撥於此項糶價內借穀石一時不能催交齊全而該
收價酌盈劑於此項糶價內借穀石一時不能催交齊全而該
原應酌盈劑於此項糶價內借穀石一時不能催交齊全而該
徵收地米陸續補近協撥但查奉天一省現據該府尹奏明以
截報除抵補外缺額亦屬無幾據該撫奏明本年收捐本色尚
且各該省鄰近省分實在此撥運至於存糶之處無多均應以
色漸次補足毋庸彼此撥運至於存糶之處無多均應以收捐
風土有燥溼年歲有豐歉價值有貴賤地方有衝僻各省情形
不同向來辦理亦量為增減其每年平糶之數因於秋後原價
買補然價平則買價貴則停總在地方平糶之數因於秋後原價
辦再查收捐監穀原所以實倉儲而備荒歉今常平倉貯既經
定額則收捐監穀自毋庸於額外增貯除不敷定額省分仍以
收捐補足外其額外有餘各省所收本色應令另案存貯遇有

賑恤卽於此內撥用或平糶穀石不能買補卽將此項穀石撥抵所存糶價造報酌撥至各省常平倉穀之外另有倉貯如河南之漕倉安徽之江甯省倉浙江之永濟倉玉環同知倉廣東之廣糧通判倉福建之新設臺灣倉以及各省之社倉鹽義等倉或因地利宜以資接濟或自爲捐輸以備歉收皆不在常平額內應令各該督撫照舊存貯各歸本案辦理另造細冊報部查核江蘇省照雍正年間定額米九十四萬二千石江西省照雍正年間定額米一百三十七萬七千一百一十三石零

乾隆十四年

上諭江南督撫等以該省紳耆士庶望幸心殷合詞奏請南巡朕以鉅典攸關特命廷臣集議今經大學士九卿等援據經史且稽

聖祖仁皇帝六巡江浙謨烈光昭允宜俯從所請朕軫念民依省方問俗郊圻近省不憚躬勤鑾輅江左地廣人稠素所廛念其官方戎政河務海防與凡閭閻疾苦無非事者第程途稍遠十餘年來未遑舉行屢嘗敬讀

聖祖實錄備載前後南巡恭侍

皇太后鑾輿羣黎扶老攜幼夾道歡迎交頌

天家孝德心甚慕焉朕巡幸所至悉奉

聖母皇太后遊賞江南名勝甲於天下誠親掖

安輿眺覽山川之佳秀民物之豐美良足以娛暢

慈懷既詢謀僉同應依議允從所請但朕將以明年秋幸五臺經太原

歷高洛趙魏回鑾已涉冬令南巡之典當在辛未年春正我

聖母六旬萬壽之年也將見巷舞衢歌騰歡獻

祝稱朕以天下養之至愛上以廣承

歡之慶下以慰望幸之忱益深嘉悅屆期諏吉以聞嚮道人員朕酌量

先期簡派前往清蹕所至簡約儀衛一切出自內府無煩有司供億

至行營宿頓不過偶一經臨卽暫停亦不逾旬日前歲山左過求華

麗多耗物力朕甚勿取曾經降旨申飭明歲晉豫等省以及江南俱不可做做至名山古蹟南省尤多亦只掃除潔淨足備臨觀而已無事崇飾儻有傾圯隨宜補葺悉令動用官項且有吉慶所奏淮商願捐之項可以報銷但當核實不得任有司浮冒其民間張燈結綵聖祖嘗以為戒載在方冊宜其恪遵慎勿以華侈相尚所司通行曉諭其一切應行典禮著照所議行

上諭關稅盈餘以雍正十三年徵收數目為定額恭紀食貨志關權

上諭大學士九卿督撫恭紀選舉志

重修安徽通志卷七

皇言紀

高宗純皇帝詔諭

乾隆十六年

上諭朕巡幸江浙問俗省方廣沛恩膏聿昭慶典更念東南貢賦甲於他省其歷年積欠錢糧雖屢准地方大吏所請分別緩帶以紓民力而每年新舊並徵小民終未免拮据朕宵旰勤勞如傷在抱茲當翠華親莅倍深軫切用普均霑之澤以慰望幸之忱著將乾隆元年至乾隆十三年江蘇積欠地丁二百二十八萬餘兩安徽積欠地丁三十萬五千餘兩悉行蠲免俾官無罣悞民鮮追呼共享昇平之福夫任土作貢歲有常經自應年清年款江蘇積欠乃至二百二十餘萬之多催科不力有司實不能辭其咎而疲玩成習豈民間風俗之澆

重刊安海通志 卷七
一
滴尙未有盡革歟朕以初次南巡故特加恩格外嗣後該地方官務宜諄切勸諭加意整頓其在小民亦當湔除舊習勉效輸將勿謂曠典可希冀屢邀而惟正之供任其逋負也其浙江一省雖額賦略少於江蘇而節年以來並無積欠豈犬牙相錯之地不齊乃至是歟此具見浙省官民敬事急公之義而江蘇官民所宜懷慙而效法者也朕甚嘉焉著將本年應徵地丁錢糧蠲免三十萬兩以示鼓勵各該督撫共仰體朕惠愛黎元之意嚴飭所屬實力奉行使閭閻咸霑實惠儻有不肖官吏以完作欠希圖侵蝕察出卽行糾參從重治罪並將此通行曉諭知之

上諭上下兩江有被災稍重之處曾經加恩將極重之宿州靈璧虹縣五河宿遷邳州睢寧海州流陽等處次重之鳳陽臨淮懷遠鳳臺壽州霍邱清河桃源安東等處分別加賑朕車駕南巡所有經過之宿

遷桃源清河三縣見其民氣遠遜他處並將所借籽種銀兩全行豁免今聞該地方官展賑之事尙未開期朕省方問俗念切民依若地方官借辦差之名致窮黎嗷嗷待哺殊非仰體朕痌瘝在己之意著布政使永齡星速親往督率該府州縣等卽日按戶開賑並傳諭黃廷桂飭令該州縣正印官不必辦差卽回本任辦理散賑務俾均霑實惠朕回鑾時或尙有不能妥協之處惟永齡是問

上諭據兩江總督奏稱上下兩江去年被水成災最重之邳宿海等州靈璧虹五河宿遷睢寧流陽等縣次重之壽州及鳳陽臨淮懷遠鳳臺霍邱清河桃源安東等縣三冬已普沾存濟而冬末春初賑期已畢青黃不接民力猶恐難支等語

上諭洪澤湖上承清淮汝潁諸水

恭紀食貨志

上諭上下兩江去年被水災民

恭紀食貨志

上諭安徽本年歲試文童府學及州縣大學增取五名中學增取四名小學增取三名恭紀學校志

上諭朕南巡江浙羣黎士庶就瞻恐後紳士以文字獻頌者載道接踵恭紀選舉志

上諭問俗觀風南巡江浙清蹕所至廣沛恩膏恭紀學校志

乾隆十七年

上諭朕聞洪澤湖周圍寬廣五百餘里恭紀河渠志

乾隆十八年

上諭據舒赫德奏上下江辦理賑務微有互異下江按月照三十日全給上江則遇閒曠扣除等語夫按日給賑例應扣除閒曠是上江合例而下江非是但江南此次被災甚重非尋常偏災可比朕心為之宵旰靡寧其上江賑務著照下江所辦按月全給不必扣除閒曠以

示優恤嗣後如遇有偏災仍照定例辦理該部即遵諭行

乾隆十九年

上諭據衛哲治奏稱安徽省現貯倉穀無幾各州縣捐監生俊除在本部報捐外有願交本色者請在本地收捐其應交穀數悉照乾隆十二年事例辦理等語著照所請安徽省生俊捐監在部報捐折色外有願交本色者准其在本地收捐以實倉貯仍著該督撫於歲底將各屬共收若干之處彙數奏聞該部即遵諭行

上諭兩江上年被水地方恭紀食貨志蠲賑

上諭江南淮揚徐海及靈虹睢宿一帶地方恭紀食貨志蠲賑

上諭上下兩江被災州縣恭紀食貨志蠲賑

乾隆二十二年

上諭今春朕恭奉

皇太后鑾輿載臨江浙恭紀食貨志蠲賑

上諭朕敬承

祖德問俗觀風嘉惠黎元培植士類恭紀學校志

上諭安徽本年歲試文章廣額恭紀學校志

上諭朕稽古省方載臨江浙將以勤求民隱廣沛恩膏恭紀食貨志蠲賑

上諭從前恩詔內令將各省年久民欠錢糧查明豁免而積欠漕項該

部未經查奏恭紀食貨志蠲賑

上諭江浙二省讞獄滋繁陳臬之司素稱劇任茲朕巡省所至覃布恩膏黎庶均霑閭閻愷樂而有罪之人囹圄桎梏實由自取亦何恤焉但念獄一成而不變其中奸民之犯法者固多而無知誤蹈之人亦所時有况未抵乎重辟尚可望其自新用播德音以符寬大所有江蘇安徽浙江等屬軍流以下人犯俱著加恩各予減等發落從此案

牘一清在閩刑各官當益勵精勤期於明慎而凡爾百姓更宜各安本業勉為良民勿謂曠典可以倖邀而輕干國憲也部議叛逆緣坐強盜免死發遣

家奴吃酒行凶棍徒生事擾害用藥迷拐子女開審誘賣並例應給披甲人為奴及擬軍之積匪猾賊情罪較重俱不准減其餘軍流遣犯俱減為杖一百徒三年徒罪及雜犯准徒為杖一百其已經到配徒犯即行釋放逃徒免緝枷杖人犯寬免應刺字者並免刺字其已經發遣軍流尚未到配者准其減等發落再江浙之人有在別省犯案遞回原籍追贖僉配人犯計其犯事在江浙軍流人犯與江浙現在軍流不同均不在減等之例

上諭淮黃並稱二瀆向來黃河水勢寧夏一經長發即將長水尺寸馳報下游之河東江南等省預為防範立法甚善淮河水報自應亦照黃河之例其上游鎮陽一關為淮水上下關鍵水勢猶易查驗大汛時著白鍾山酌委委員在彼探報庶上下游呼吸可通而淮水匯聚之洪澤高寶諸湖得以先事預籌相機調度著交兩江總督安慶河南巡撫飭行所屬沿河各州縣一體遵照將水勢長發情形隨時報

重刊安徽通志 卷十
明江南河道總督查核如有違延耽擱責成各該管道員挨查究處以重河防

上諭江蘇安徽山東河南四省連界瀕河處所屢年被水昨已降旨交各督撫及河臣會同侍郎裘曰修夢麟等悉心籌辦該處雖向係水鄉此番經理於一勞永逸卽未輕言而從前積水之由與現今疏洩之道必須通盤籌畫得其要領以期水患漸消在該督等自屬分內應辦而欽差既經受事亦與有責成所有一切興舉工程頭緒繁多須委員分段疏築任得其人方可工歸實用除將現在河工人員及地方正佐各員遴選差遣委用外如或不敷該督撫各酌量地方情形奏聞請旨交部揀選發往以資集事

乾隆二十三年

上諭各省倉儲向例春借秋還

恭紀食貨志儲積

乾隆二十五年

上諭江蘇錢穀殷繁安徽布政使遠駐江寧所辦專係上江事務莫若於江蘇添設藩司分職管理方爲有益前曾降旨該督撫等令其酌議將安徽布政使仍回駐安慶而於江蘇增設藩司一員駐劄江寧分隸管轄一切政務庶可從容就理今據尹繼善等奏到請將江淮揚徐海通六府州分隸江寧藩司管轄蘇松常鎮太五府州分隸江蘇藩司管轄其安徽布政使移駐安慶專辦上江事務等語著照所請蘇州布政使事務現有蘇崇阿管理江寧布政使員缺卽著託庸調補安徽布政使員缺著許松佶調補其應行添設衙署養廉官吏經費各事宜著該督撫等詳悉定議具奏

乾隆二十七年

上諭今春朕恭奉

重修安徽通志

卷七

五

皇太后鑾輿巡省江浙便道閱視河工海塘與封疆大臣講求吏治民生諸要務念昨冬恭逢

慈恩覃被之餘正東南士民望幸情殷之候翠華所過宜沛隆施益光慶典著將江蘇安徽浙江三省自乾隆二十二年起至二十六年止所有節年災田緩徵及未完地丁各欠項照二十二年例概予蠲免該督撫等其嚴飭所屬悉心核實奉行俾閭閻膏澤均霑毋致胥吏中飽副朕錫類推恩至意該部遵諭速行

上諭朕稽古省方乘春布令而清理庶獄矜卹尤深用沛德音式昭慶典所有江蘇安徽浙江三省軍流以下人犯俱著加恩各予減等發落凡親民之吏其諄切誥誡俾知改過自新共享太平之福

年二十四年之例除緣坐等項情罪較重毋庸查辦外其一切尋常軍流遺犯並犯該發黑龍江甯古塔及內遣雲貴兩廣人犯不在前議之內者一體照例減免

上諭三吳兩浙文風素盛前此清蹕時巡嘉惠膠庠頻增試額

上諭安徽本年應試文章廣額

上諭尹繼善奏江省額設經制千把外委每因不敷派調酌添額外外委一體差遣請明定章程照經制外委一半之數添設報部備案等語前因吉林將軍恆魯奏請添設差委員弁朕以此等額外增給頂帶之員並非體制如果必須添派自應報部定額現已行查盛京等處另行酌辦今尹繼善復有此奏可見外省似此通融添設者所在皆是矣外委已有經制定數而督撫提鎮等於數外又復自行添委並不報部備案此等員弁雖微均關名器若竟任意派用無憑稽核將來冒濫之漸何所底止在督撫不過為調遣足用起見而微末無知恃有護符動致滋事亦勢所不免何如通行確核明定章程於官制辦差均為有益著該部行文各省督撫等查明本處實在有無添

設情形據實報部將各處營分之大小名數之多寡量為酌定並將
 添設人員如何拔補經制外委以及一切報部稽查事宜詳悉定議
 具奏

部議查原設經制外委既按兵數之多寡為衡則額外酌添自
 應仍按經制之額數為斷向來經制外委原與千把等分汛協
 防是以酌定數較多至於額外再行增添不過供應一切差使臣
 等悉心酌議各省外委應照經制原額添設一半已足敷用查
 蘇州巡撫標下額設經制外委五員今請添額外委十一員
 未免過多應准其添設二員以上酌定名數行令該撫於兵丁
 內揀選給補按季報部照經制外委酌給頂帶仍食本身糧餉
 毋庸議給隨糧照舊隨營差操怠惰誤公者咨部斥革行走勤
 慎者遇有把總以及經制外委缺出准其
 一體揀選拔補通行各該省遵照辦理

乾隆二十八年

上諭據富明安奏江省城垣現在修理完整請嗣後令各道府查勘具
 結每年歲底督撫據實奏聞等語城垣為地方保障之資自應一律
 完固以資捍衛第地方官吏往往視為具文或任其坍塌不問日久
 因循或修葺有名無實徒糜帑項皆所不免著各省督撫嗣後令該

管道府將所屬城垣細加查勘如稍有坍塌即隨時修補按例保固
 仍於每年歲底將通省城垣是否完固之處照奏報明穀數之例繕
 摺彙奏一次著於各省督撫奏事之便傳諭知之

上諭據託庸奏亳州懷寧二城現在修竣將來如續有坍塌即照今修
 之例聽民自為經理修補一摺其言雖為慎重工程起見但此端一
 開有司奉行不善必致為閭閻苦累不可不防其漸城垣所以衛民
 如遇應修之時士民中有急公任事出貲承修者原有議敘之例以
 示鼓勵至現在完竣之處保固自在工員與地方官使竟定為民修
 不惟在事者得以藉口且恐不肖胥吏從中因緣苛派所關尤匪淺
 鮮設現今修理之城垣附近居民轉或有偷竊輒料作踐等情事自
 宜嚴禁犯者治以應得之罪可耳何得竟定為閭閻認修之例致滋
 弊累耶託庸著飭行仍將通諭各督撫知之

乾隆二十九年

上諭據託庸奏安徽省應修城垣三十四處現在收捐銀數已敷應用其餘具呈未收銀兩聽士民陸續完納等語該省勸輸報捐原為估修城工之需既已捐輸足數自應即行停止所有報捐未收銀兩亦可聽其自便至修理城垣所以衛民在急公者既得邀頂帶以榮身而無力貧民亦可藉工餬口其事洵屬有益江蘇省前曾奏准一體捐修昨浙省亦經奏明仿照辦理戶部以三省不便同時報捐議駁今安徽省既停止收捐則此項捐例自應歸江蘇專辦俟江蘇收足後遞及浙江此外各直省如有應修城工費用浩繁必須捐修者亦可隨時奏聞以次仿照遞辦將此通諭該督撫知之

上諭荆山橋水利河道地屬江南

恭紀河渠志

上諭前將周易述義詩義折中春秋直解告成

恭紀學統志

乾隆三十年

上諭朕恭奉

皇太后安輿四巡江浙東南黎庶望幸情殷宜布渥恩用光盛典

恭紀食貨志蠲賑

上諭朕時巡江浙清蹕所經恩膏疊沛軍民士庶無不忭舞臚歡而清理庶獄亦矜恤所宜逮用循舊典以廣深仁著將江蘇安徽浙江三省軍流以下人犯俱加恩各予減等發落俾得改過自新勉為良善共享太平之福

部議緣坐等項情罪較重人犯照二十七年之例毋庸查辦外凡改發新疆人犯情節較重亦毋庸查辦

上諭向來選拔貢生定例惟府學准選二名州學縣學均係額取一名

茲著加恩將江蘇安徽二省所有分設各縣准於本年選拔時每學

各取一人

恭紀學統志

上諭三吳兩浙文風素盛其將江蘇安徽浙江三省本年應試文童增

重修安徽通志

卷七

八

重刊安徽通志 卷十
取恭紀學
校志

乾隆三十一年

上諭湖廣江西浙江江蘇安徽河南山東漕米著接年分省蠲免一次

恭紀食貨
志蠲賑

上諭前經降旨將各省漕糧分年普免 恭紀食貨
志蠲賑

乾隆三十二年

上諭前於乾隆十七年通行蠲免直省應徵錢糧會令各督撫轉飭州縣官勸諭有田之家酌減佃戶租糧使之均霑惠澤上年春初朕特沛恩施降旨將各省起運漕糧分年蠲免一周俾薄海農氓共叨樂利在有田業戶於輪輸漕米之年已得倍裕蓋藏而佃戶等尚未得一體仰邀曠典著各省督撫屆輪蠲年分通行曉示勸諭各業戶等照每畝應蠲漕米數內亦令佃戶免交一半務期愷澤均敷使納糧

力穡之人倉箱並資盈阜該部遵諭即行

乾隆三十三年

上諭高晉奏上下兩江地方本年五六月間雖間得雨澤未能一律普徧近水低田尚可車引高阜之區難於耳灌時已及秋不能趕種襍糧等語所奏為時太遲已於摺內批飭矣朕於農田晴雨常塵宵旰每諭各督撫隨時入告冀得周知薄海民生休戚早施補助今兩江夏雨愆期地方政務孰有要於此者該督等所司何事豈竟漠不動念不及早據實上聞乎至該處水鄉窪地可引漑蒔秧者收成自不致歉薄其高田山阜趕種既逾節候恐不免有偏災朕心甚為軫念著該督撫迅速查明通省各屬有被旱成災應行賑恤之處即行董率屬員實力妥協查辦毋使閭閻稍有失所以副朕惠愛黎元至意仍一面將辦理實在情形速為奏覆其應緩徵者即行緩徵以紓民

重刊安徽通志 卷七

七

望該部即遵諭行

上諭聞兩江江西等省民間行用制錢內多有攙入翦邊小錢者雖經地方官查禁其風總未能止息此等匪徒敢將制錢私自翦邊銷毀殊干法紀雖聞有查出治罪者不過民間零星使用究之伊等所翦錢邊碎銅非另鑄私錢即改造器皿售賣時必有蹤跡可尋若即將另銅鎔化總賣亦必有銅鋪向其收買市井細民安得盈千累百之銅其形跡更易於推究若於此嚴密訪拏方為正本清源之道著傳諭高晉彰寶馮鈴吳紹詩等即督飭所屬實力上緊緝拏務將窩主及售賣店家嚴行追訊使奸匪無從潛匿以杜根株毋得僅以具文塞責

乾隆三十四年

上諭安徽上年得雨稍遲間被偏災著加恩加賑

恭紀食貨志蠲賑

上諭學政舉報優生

恭紀選舉志

乾隆三十五年

上諭朕寅承丕緒撫有萬方申旦求衣無日不以勤卹民依為念是以劭農省歲減賦追徵不靳多費帑金期間閭閻共臻康阜溯在乾隆十一年丙寅朕御宇周旬肇敷闡澤曾恭依

皇祖普免天下錢糧恩例蠲除直省額徵正賦二千八百萬兩有奇越在三十二年丙戌際當必世興仁益惟比戶饒裕是計復下詔將應徵漕米省分照康熙年例概蠲一次俾各倉箱盈衍倍積耕餘邇年以來寧宇乂寧民氣和樂惟

上天享佑我邦家洵錫康年頌符綏屢朕祇膺

吳蒼鴻眷其可不究澤推仁以與我海內元元答茲

嘉貺我國家席全盛之模內外經費度支有贏無絀府庫所貯月羨歲

增因思天地止此生財之數不在上即在下與其多聚左藏無寧使
茆簷蔀屋自為流通迺者仰紹

列祖貽庥化成熙洽為民藏富欣際斯辰且今年為朕六十誕辰明歲

恭逢

聖母八旬萬壽普天忭祝慶洽頻年尤從來史册所未有是宜更沛非
常之恩以協

天心而彰國慶茲用乘春頒令誕布陽和著自乾隆三十五年為始將

各省應徵錢糧通行蠲免一次其如何分年遞蠲之處著大學士會

同該部即速詳議具奏

部議查上屆普蠲之時按照各省地丁錢糧
數目均勻搭配分作三年輪免今次應循照
辦理所有直隸河南湖北湖南貴州雲南安徽七省共計地丁
錢糧銀九百七十二萬四千四百餘兩俱請於本年全行蠲免
其江蘇江西福建陝西甘肅廣東廣西四川八省共計地丁錢
糧銀九百四十九萬四千三百餘兩請於次年全行蠲免奉天
浙江山東山西四省共計地丁錢糧銀八百七十二萬七千八
百餘兩請於壬辰年全行蠲免至於各直省蘆課漕項例不並

蠲均應照舊收納又應徵地丁錢糧內隨徵耗羨一項係充地
方一切公用並非解部之款上屆普免案內定議照例輸納此
次應徵耗羨亦應照舊徵收留充地方公用其有向年緩徵帶
徵之項應於各該年徵收者不便以正項既蠲再行展限轉至
下年新舊並徵應請遇有緩徵帶徵
錢糧省分仍於蠲免之年照例徵收

上諭朕嘉惠闔俾益藏富始和布令將直省應徵正賦普免一周因

思有田業戶應納條銀者既已廣被恩膏則食力佃農自應亦令其

分霑渥澤前此丙寅丙戌二年普蠲錢糧漕米曾諭各業戶就所蠲

之數量減佃租伊等亦深知感戴朕恩推施亞旅此次又值加恩普

免著各該督撫遇輪蠲之年徧行勸諭各業戶等照應免糧銀十分

之四令佃戶准值減租使得一體仰邀慶惠在有田之家歲入所資

固難強其分逮而正供既免食德宜均諒無不共稟天良歡忻從事

佃戶等亦不得因有此旨藉口抗租以副朕一視同仁至意

上諭安徽各屬上年因春夏雨多或江湖泛漲被有偏災著加恩加賑

恭紀食貨
志綱脈

乾隆三十六年

上諭昨裴宗錫奏安徽買補倉穀請照江蘇巡撫薩載奏准之例於正價外每石增銷運腳銀八分經戶部議駁以薩載所奏係特旨俞允之案未便援照請增已依議行矣但恐江蘇安徽兩省向來采買穀石報銷價值相同今江蘇既因現在購運不敷允其加增運腳安徽事同一例亦著加恩准其每石於正價外增銷腳價銀八分分別省不得援以爲例

乾隆三十七年

上諭據李瀚奏請停編審造冊一摺所見甚是已批交該部議奏矣第思編審人丁舊例原因生齒繁滋恐有漏戶避差之弊是以每屆五年查編造冊以備考覈今丁銀既皆攤入地糧而滋生人戶又欽遵

康熙五十三年

皇祖恩旨永不加賦則五年編審不過沿襲虛文無裨實政況各省民穀細數俱經該督撫於年底專摺奏報戶部核實具題付之史館紀載是戶口之歲增繁盛俱可按籍而稽更無藉五年一次之另行查辦徒滋紛擾此摺毋庸交議嗣後編審之例永行停止將此通諭各督撫知之

上諭據戶部議奏乾隆三十七年鳳陽關徵收盈餘銀兩較上屆短少七萬一千三百餘兩又淮安關盈餘銀兩短少九萬八千五百餘兩均請交高晉派員確查據實具奏各摺俱依議行矣盈餘非關稅額徵每年贏縮原不能畫一然亦當約計不相上下竟致多寡懸殊自不可不徹底清查以期核實防弊但歷年以來俱視上屆爲比較非特少者易於見絀卽多者亦恐歲日加增伊於何底從前曾經降旨

重刊安徽通志 卷十
盈餘悉以雍正十三年爲準因其時正當諸弊肅清豐約適得其平
是以用爲成則如果較核相倣尙在情理之中今鳳陽關短少數目
雖較上年驟減七萬餘兩而較之雍正十三年計多銀二萬六千餘
兩今數尙勝於前至淮安關短少數目比上年短少之年又短至九
萬餘兩卽較之雍正十三年亦尙短六萬餘兩之多其間殊不可解
必有別故該監督等每以過關船隻稀少爲詞不知估舶流通往來
不絕卽或間有多少亦斷無一年之內商販裹足不前至於此極其
中必別有因監督屢更乘機收多報少及影射侵漁情弊希圖藉詞
朦混尤當切實嚴查使之水落石出著傳諭高晉卽將淮關鳳陽關
二處究係因何虧短各情由派委明幹大員嚴密訪查務得實在真
情據實具奏毋得任其少有欺飾

乾隆三十八年

上諭裴宗錫覆奏查辦軍屯一案據稱糧道林文德稟請將上下江無
爲等十七州縣向不歸運之裁衛屯田一槩加徵津費該撫以加徵
津貼事屬創始必須確查實在情形酌籌尙無定議等語所辦非是
而加徵之名更屬不能深體朕意前經嘉謨陳奏屯田原以贍丁若
聽其私相售買丁力必致日疲是以令各該督撫查辦原指近年出
運屯田之典責在民者而言卽須徹底清查亦祇可從乾隆年間查
起辦理尙易爲力其在雍正年間者已屬年遠難稽若國初早經裁
并州縣田地久按民賦起科更難悉行追溯卽其中有較民賦輕者
尙得云借屯田爲影射若已與民賦相等及加重者小民又何所利
而爲之此理之顯而易見者裴宗錫何見不及此耶至於實係屯田
有據則係逃軍入民之類應酌爲津貼仍屬以屯濟運自相資助亦
不宜稱官爲加徵朕惠愛百姓普蠲恩免不下數千百萬惟期家給

人足樂利永臻何獨清釐屯糧一節欲舉百餘年相沿之民產一旦忽議加賦朕豈肯爲之卽謂疲丁宜恤又豈可因恤丁而轉以累民乎況旗丁如果疲乏亦必以漸而致從前楊錫紱爲總漕最久頗能體恤運丁何未聞其議及於此豈丁力獨疲於近日乎其間或實係屯產轉售他人而豪猾者貪圖輕賦以逞其侵隱此等官爲之經理實所宜然若因此而追究遠年之民產且定以官爲加徵之名則斷乎不可此事著交高晉妥協查辦迅速完結毋致稽延時日其江蘇省並著一體照此旨辦理

乾隆三十九年

上諭上年安徽省雨水過多夏麥秋禾兩被災傷著加賑以資接濟

食貨志

乾隆四十一年

上諭昨歲安徽江蘇地方恭紀食貨志

乾隆四十二年

上諭前因

聖母萬壽特宏錫類之仁普蠲各直省錢糧以昭慶惠朕本欲俟恭祝

聖母九旬萬壽之年再溥恩施一次茲者

仙馭升遐此後更無可推廣

慈仁之處現在部庫帑項又積至七千餘萬著再加恩自戊戌年爲始

普蠲天下錢糧仍分三年輪免俾寰宇億兆人民仍得共被

慈恩永申感慕而朕終天罔極之忱雖不能仰酬萬一庶幾藉茲稍展

其如何輪派年分著戶部卽速悉心核奏遵行

部議查各省除蘆課漕項不在蠲免之例外其地丁錢糧額銀約共二千七百五十九萬四千餘兩請將直隸江蘇安徽四川陝西甘肅雲南貴州等八省地丁錢糧共銀九百二十八萬餘兩於戊戌年全行蠲免山東山西浙江湖南湖北等五省地丁錢糧共銀九百四十七萬六千餘兩於己

亥年全行蠲免奉天併吉林所屬山西河南福建廣東廣西等
六省地丁錢糧共銀八百八十二萬七千餘兩於庚子年全行
蠲免至應徵地丁錢糧內隨徵耗羨一項係充地方一切公用
並非解部之款節次普免案內定議照例輸納此次亦應照舊
徵收留充地方公用其有向年緩徵帶徵之項應於各該年徵
收者不便以正項既蠲再行展限轉致下年新舊並徵應請遇
有緩徵帶徵錢糧省分仍於蠲免之年照例徵收
所有各省歲需經費銀兩臣部另行籌酌辦理

乾隆四十三年

上諭安徽亳州等州縣被災較重著照例撫卹恭紀食貨志蠲賑

上諭大學士管兩江總督高晉閩浙總督楊景素等合詞陳奏以江浙
臣民望幸甚殷且河工海塘皆冀親臨指示懇請於庚子春再舉南
巡盛典以愜輿情一摺朕於乙西南巡回鑾時因耆儒攀戀情殷曾
許以翠華再莅然敬念

聖母皇太后春秋已高難以再奉

安輿長途遠涉遂諭江浙大吏不必更以南巡為請而江鄉士庶愛戴

依戀之情狀未嘗不往來於懷距今已十有四年其喁望悃忱自益
肫切且自前巡閱定五壩水誌以為展拓清口之準下河從此遂免
水災嗣聞黃河倒漾所繫甚重因酌定挑濬陶莊引河面諭薩載等
辦河成而清黃交匯處移遠清口不復有倒灌之患但下游尚有停
淤亦不可不除其流弊而一切善後事宜若非親莅閱視究不能悉
其實在情形至浙省海塘近來潮勢漸趨北岸深為慮念亦不可不
親為相度機宜今高晉等既有此奏著照所請於乾隆四十五年正
月諏吉啟鑾巡幸江浙便道親閱河工海塘所有各處行宮座落俱
就舊有規模略加葺治毋得踵事增華致滋煩費至該督等以庚子
年適逢朕七旬萬壽欲就近舉行慶典則斷不可朕本意以庚子年
為朕七旬慶辰越歲辛丑即恭逢

聖母九旬萬壽斯則敷天同慶自當臚歡祝

暇以抒萬姓悃忱今既不能遂朕初願尚復何心為己稱慶况朕蹕途
 所經老幼歡迎扶攜恐後未嘗不顧而樂之若經棚戲臺侈陳燈綵
 點綴紛華飾為衢歌巷舞深所不取且非所以深體朕意也不特江
 浙臣民不當為祝釐之舉即凡內外大小臣工於朕七旬萬壽時亦
 均不得請行慶典以及進貢獻詩若伊等為欲藉以申其尊敬之誠
 是轉增朕心之不悅尚得謂之忠愛乎但天下士民遇朕七旬萬壽
 皆不免望恩倖澤此則情理之常朕亦何肯因不舉行慶典併靳恩
 施乎著於己亥年八月舉行恩科鄉試庚子年三月舉行恩科會試
 以彰壽考作人之盛至各省漕糧於乾隆三十一年普免一次茲蒙
 昊蒼眷佑累洽重熙朕敬體
 天心愛養億兆用是再沛恩膏著於庚子年為始復行普免天下漕糧
 一次俾藏富於民共享盈寧之福所謂敏福錫民慶莫大焉其開科

事宜著交禮部查例辦理其各省漕糧應如何分年輪免之處著交
 戶部詳悉妥議具奏將此通諭中外知之

州徐州淮安五府屬四十六年免山東省並免江蘇之江甯蘇州揚
 州鎮江太倉海州通州六府屬四十七年免江蘇之江甯蘇州揚
 州二府屬四十八年免江蘇之江甯蘇州揚州二府屬四十九年免
 州一年免湖廣省並免江西之南昌府屬四十九年免江蘇之江甯
 六府屬仍分作七年並免江西之南昌府屬四十九年免江蘇之江甯
 子及民戶仍分作七年並免江西之南昌府屬四十九年免江蘇之江甯
 糧年分免此項應照部議辦理至各省漕糧應如何分年輪免之處著
 及京口兵糧之用如有餘剩報部酌收以爲撥充此項亦應照部議
 各省徵收動支數目多寡不一報部酌收以爲撥充此項亦應照部議
 銀米徵收該撫等以爲數無多且應需之項蘇省等項徵收隨漕以
 動給奏請緩俟次年按數徵收及船項減半等項徵收隨漕以
 米爲數較多仍請照額徵收以爲撥充此項亦應照部議辦理
 督撫奏明仍請照額徵收以爲撥充此項亦應照部議辦理
 規應令該督撫地方官將應免漕糧應免各情形詳細分核填
 行曉諭轉飭各地方官將應免漕糧應免各情形詳細分核填
 發清單分給各戶俾使遵照免漕糧應免各情形詳細分核填
 兵米一萬二千餘石向係在豫東二省新運米內各半動撥
 搭運天津北倉交卸今該二省漕米既餉所有應需兵食自應

項為籌辦查豫東二省停運薊糧一項本係留備直省不時之需現在積貯尚多前項應需兵米應令在於該二省附近水次存貯薊糧米內遇蠲免該二省之年即將此項薊糧用漕艘如數運供以裕兵儲

乾隆四十四年

上諭據閱鶚元奏各省郡邑志書內如有登載應銷各書名目及悖妄著書人詩文者請一概俱行剷削等語所奏甚是錢謙益屈大均金堡等所撰詩文久經飭禁以裨世教而正人心今各省郡邑志書往往於名勝古蹟編入伊等詩文而人物藝文門內並載其生平事實及所著書目自應逐加芟削以杜謬妄至從前各省節次繳到應燬書籍經朕發交館臣覆看奏定應行燬銷者俱經該館陸續咨行各省自可遵照辦理著傳諭各督撫將省志及府州縣志書悉心查核其中如有應禁詩文而志內復采錄并及其人事實書目者均詳悉查明概從芟節不得草率從事致有疏漏

上諭亳州蒙城一帶被災較重著再賞給口糧恭紀食貨志蠲賑

上諭向來各省提鎮以下至將弁等恭紀武備志

上諭國家設兵衛民簡核軍實期於行伍整齊兵額充足恭紀武備志

旨此次挑補各省名糧議給武職養廉恭紀武備志

上諭據金簡奏現在各省增設額兵多寡不一若分布各營其勢散其力亦單請於督撫所駐省會將此項增添之兵歸隸督撫本營以資彈壓一摺恭紀武備志

乾隆四十五年

旨安徽積欠丁漕等款著全行蠲免恭紀食貨志蠲賑

上諭三吳兩浙文風素盛前此清蹕時巡嘉惠膠庠特增試額恭紀學校志

上諭朕鑾輅時巡乘春行慶而清理庶獄矜恤尤深用沛德音式敷愷澤所有江蘇安徽浙江三省恩詔後軍流以下人犯俱著加恩各予

減等發落用昭肆眚施恩至意部議應減不應減條款照三十年之例辦理

乾隆四十七年

上諭上年安徽鳳陽泗州等屬被淹著概行加賑一月恭紀食貨志蠲賑

乾隆四十八年

上諭上年安徽鳳陽等屬被淹著概行加賑一月恭紀食貨志蠲賑

乾隆四十九年

上諭江省為財賦重地茲入疆伊始渥澤宜覃恭紀食貨志蠲賑

上諭安徽亳州等屬錢糧著分別蠲緩恭紀食貨志蠲賑

上諭江浙兩省文風素盛前此翠華臨幸曾降旨增廣試額恭紀學

上諭朕清蹕巡方順時行慶而矜恤庶獄塵念尤深宜沛德音用敷愷

澤江蘇安徽浙江三省軍流以下人犯俱著加恩各予減等發落用

昭肆眚施惠之至意部議照四十五年之例除叛逆緣坐強盜免死發遣家奴喫酒行凶棍徒生事擾害用藥迷拐

子女開竈誘賣為從等例應給披甲人為奴改遣之積匪猶賊搶竊滿貫及三犯竊盜擬絞緩決減等及偷創人參私鑄十千以上為首不及十千為從擬斬絞決減等及偷創人參私鑄十千項人犯俱情罪較重不准減等外其餘尋常軍流遣犯並犯該發遣黑龍江甯古塔及雲貴兩廣不在前議條款之內者俱減為杖一百徒三年徒罪人犯減為杖一百准徒總徒遞減一年已經到配決杖徒犯即行放釋逃徒並免緝拏

乾隆五十年

上諭上年安徽亳州田畝被淹著再行加賑一月恭紀食貨志蠲賑

上諭亳州等十五州縣著分別酌借籽種賞給口糧恭紀食貨志蠲賑

上諭據書麟奏安徽等各府州縣屬自五月以後雨澤愆期田禾未獲

播種齊全秋收勢已歉薄查安省漕糧於明年即屆輪免之年可否

改於本年蠲免俾全省早霑闡澤等語所奏甚是本年安省各屬被

旱較廣業經疊次加恩緩徵賞給口糧並前後截漕十五萬石以備

賑恤但雨澤既稀農田秋收不免薄歉民間口食自倍形拮据著照

重刊安徽通志 卷十
所請將安徽省乾隆五十一年應行輪免漕糧准其改於本年蠲免俾
閭閻無事輸將得以安心耕作以副朕軫念窮民有加無已之至意
該部遵諭速行

上諭據書麟奏安徽省桐城廬江等處紳士有誼篤桑梓者或出餘米減
糶或醵金稟縣請票前赴江西販米至本籍減糶等語安徽省安慶廬
州等府屬被旱成災該處紳士誼敦任卹減價出糶甚屬可嘉著該
督撫查明共有幾人據實奏聞照例賞給議敘以示優獎

上諭據吳垣奏籌辦採買糶賑事宜接濟民食一摺內稱四川產米最
廣現仍招商採買儻彼處商民自行販運到楚如欲運赴江蘇安徽
者毋許攔截阻滯若自願沿途銷售亦聽其自便俾湖北江蘇安徽
三省俱得均勻接濟等語所辦甚好為大臣者皆當如此存心不分
畛域方是已於摺內詳晰批示江蘇安徽向皆仰給於川楚等省諺

云湖廣熟天下足今湖北被旱地方較多勢不能不藉川米以資口
食如湖北商人赴川採買李世傑當明切曉諭令川省人民毋得居
奇抑遏使以川省之有餘濟湖北之不足而川省商販米船到楚湖
北民人不可狃於平日之糧價平減不肯加增價值希圖賤糶至令
商販無所獲利裹足不前特成額吳垣當出示勸諭以湖北民人因
地方繁庶豐年不知撙節粒米狼戾以致

上天示譴被旱成災今鄰省販運到境災民口食有資益當共相引咎
激發天良卽商販圖利索價稍昂亦應增值糶買稍費已資俾商人
得霑餘潤亦弭災徼福之道如此明切開導庶商運得有利息自當
源源而來可無缺乏至川省米船過楚運赴安徽江蘇者湖北省亦
不可盡數截留庶上下兩江均資接濟如此則四川江西米船皆接
續前往安徽江蘇二省米糧自應湊集其本省商民亦不得觀望居

奇過昂其價薩載書麟務須飭屬徧行曉諭俾米糧流通價值不至騰踊似此通盤籌辦彼此照應則三省歉收地方均有裨益吳垣摺併著鈔寄各督撫閱看仍將如何招徠勸諭情形迅速覆奏

上諭本年河南山東江蘇安徽湖北等省春夏之間雨澤缺少被旱處所較多業經節次降旨分別蠲賑各該處災黎餬口有資自不致復虞失所惟是被災地方米糧價值昂貴該處兵丁所得月餉恐不敷買食生計未免拮据著傳諭河南山東江蘇安徽湖北各督撫卽查明坐落災地各營兵丁其被災較重者賞借兩月餉銀於明年夏秋二季扣還被災稍輕者賞借一月餉銀於明年夏季扣還俾得養贍身家無虞食貴該督撫其實力體察奉行以副朕體卹兵丁之至意

乾隆五十一年

上諭上年安徽被災較重之亳州等十九州縣再行加賑一月

恭紀食貨志蠲

賑

上諭上年安徽省旱災較重該州縣著賞給口糧

恭紀食貨志蠲賑

上諭據書麟奏太湖縣唐家山地方鄉民掘空蕨根見土內襍有黑米磨粉攪和好米煮食頗可充飢民間風踵至刨空等語此項刨出黑米或卽從前窖藏之物但唐家山地方並無民人居住或竟係天地生出以濟饑民口食亦未可定該處既有此自然之利爲數較多恐遠近居民聞風刨空以致攘奪紛爭亦所不免現在雖有該縣駐彼彈壓但必須妥協管束俾小民旣得藉資貧乏仍不致忿爭生事方爲妥善著將此傳諭該撫飭屬加意彈壓勿令滋生事端併查明該處民人刨空時有無爭競之處據實覆奏

